

度

支

奏

議

度支奏議卷之三十二

新餉司目錄

本部回奏豆折未發實數疏

議覆南陽新派三釐疏

覆東撫條議寬恤緩徵疏

覆部科條陳海運興革利弊疏

覆陝西吳按院議留公費賞功疏

題再剖三年豆折存積之虛疏

同兵部會覆津撫酌運島糧疏

覆四年分鮮運事竣疏

覆給島兵布花疏

覆宋吏科萊陽久守接濟登餉疏

查覆入援黔兵支過餉銀疏

覆山永巡撫查補原借銀兩疏

同兵部合奏永鎮經制疏

覆澳夷支銷錢糧疏

覆中協王兵脩築塩菜疏

覆津撫議造運缸疏

題議津運島糧疏

覆閩省貼駕并撫按軍餉解部疏

覆中州鄉紳條議撫輯留餉疏

題報三河境內強賊劫餉疏

會同刑部覆葉有光等侵損糧料疏

題定各鎮援萊兵餉造支東省疏

覆楚按題豁黃州府歐推官叅罰疏

覆查關門應存行守二糧疏

覆山西留餉疏

度支奏議卷之三十二

太子太保戶部尚書淄青畢自嚴視草

本部回奏豆折未發實數疏

題爲遵

旨明白自行回

奏事專理新餉山東清吏司案呈崇禎五年七月初一日奉本部送戶科抄出本部題覆前事等因本年六月二十九日奉

聖旨豆折既未解發卽當奏明何待奉旨稽查始以

出數太溢通融補奏爲辭還著將未發應存實數  
開明來看欽此欽遵抄出到部送司查得預計疏  
內崇禎三年分原派關外豆折銀四萬六千九  
十七兩八錢五分六釐四年分原派關外豆折  
銀九萬二千四百兩五年分原派關外豆折銀  
八萬四千兩原共派有豆折銀二十二萬二千  
四百九十七兩八錢五分六釐與該道陳新甲  
原疏所開數目相符此卽未發應存之實數也  
相應遵

旨具覆案呈到部該臣等看得關外原額馬匹甚多而見在馬匹實少每當預計料豆日輒爲多索臣部欲減其額則戰馬便束於限制而折衝無賴諛之所不敢出也欲如其數則

畿甸久困于召買而糜費益奢力之所不能辦也於是不得已而爲給折之說異日若果有馬則給折亦可資騰驤而不苦窘乏若果無馬則庫銀仍可濟軍興而不必多發此區區節省初念云耳逮後以見運本色秣見在馬匹充然有餘

果不出臣部之所料則既省召買又省轉運并  
省給折而一念節省之苦心亦少遂矣夫錢糧  
有未發之實數卽有應存之實數計豆派三年  
未發者二十二萬二千四百九十七兩零則新  
庫三年應存者亦二十二萬二千四百九十七  
兩零一數計而了然者但此項在所入之中雖  
有此數而秦晉滇黔蠲免題留者非此入數垂  
此項在應出之中雖有此數而征調行鹽額外  
頗增者非此出數乎所入日減所出日溢通融



補濫勢不得不然非臣部借以爲辭也譬如月  
用百錢額內十九已用十一尚存而額外用者  
復十五也仍欲存此十一能乎不能乎臣部題  
發諸疏日塵

睿覽其未題者卽未發者此項從未題發故亦無庸  
題未發亦非臣部之敢於隱漏也今奉闕明來  
看之

旨謹據實具奏伏乞

聖明鑒察施行

崇禎五年七月初七日具

題本月十三日奉

聖旨豆折一項三年節存優有二十二萬餘金其他  
豈無減省至蠲免題留行鹽等項亦可歲計所出  
何嘗日溢况槩稱通融補奏錢糧頭緒何繇清楚  
前有旨著贏餘以備大用何乃有缺卽呼有存不  
報著該司官回將話來欽此

議覆南陽新派三厘疏

題爲加派原有成規代任大非通論懇祈

勅部酌議以遵

明諭以垂畫一事專理新餉山東清吏司案呈案牘  
五年正月二十九日奉本部送戶科抄出尚寶  
司等衙門司丞等官劉之鳳等奏前事內開  
國家不得已而加派也我

皇上不知幾爲慎重始則曰每畝加派九釐既則曰  
每畝加派三釐煌煌

聖旨明若日星固未嘗曰每糧若干石每歲若干石  
也誠以海內則壤糧有重輕畝無增減有重輕  
照之加派則人得高下其年無增減照之加派  
則人可畫一而待此立法之善行之數年頒之  
通省未有敢易者也矣聖崇禎四年間鄖陽撫  
臣梁應澤爲宛民任德創爲照糧加派之說緣  
應澤於河南中止轄南陽一府南陽正糧獨輕  
故獨提糧立論欲以南陽改畝論糧之所餘攤  
之七府以分任其每畝三釐之新派蓋從南陽

起見實未從閩省八府額賦重輕偏枯之數一  
平心而較量之耳臣等身在水火中萬難剗自  
已之肉醫他人之瘡請悉言其不平之實以籲  
天請命焉夫南陽正糧輕七府正糧重從

國初以至今日二百餘年自是重者難而輕者易  
而卒無敢爲重者請減法定故也今乃改

聖上照畝加派之

諭爲照糧加派之法是輕者愈輕重者愈重夫法之  
所貴乎變通者爲其酌盈濟虛也輕者不惟不

議加而反議捐重者不惟不議捐而反議加可謂平平可謂變通乎且不獨此也

皇上明諭每畝三釐加派以南陽之畝計之應得三萬九千九百餘兩若論糧則止應得九千九百餘兩是每畝止得七毫尚不及一釐也受德者何偏私也而以其所遺三萬兩攤派于七府之糧數內遂將每畝攤至四釐多矣以河南開封歸德懷慶等府之河水爲災民不聊生以衛輝汝寧等府之半石半沙累年荒歉土野蕭條

德府之漳滏淹沒馮夷爲患人民轉徙盜賊頻興加以磁州爲重兵團聚撫臣移鎮之地連年入援軍資供億百倍他處此皆以衝敝之區肩風重之糧忍死吞聲不敢以告者卽照三釐起派已爲竭已枯之髓而况平代人任派每畝多任一釐也七府之受累又何獨苦也所以河南左布政賈鴻洙寧甘任湊辦補解而不忍攤之七府此其一片軫念合屬斟酌輕重之苦心有獨觀其不平而難于言者臣等若不爲

皇上道破則七府執紃才遺含寬受苦又何自而達  
九關乎總之法一則行法紛則格事欲持平議貴可  
久伏祈

勅下該部議覆或行撫按酌奏庶輕重苦樂得均而  
積困之累其有瘳矣等因本年正月二十七日  
奉

聖旨該部查議具奏欽此欽遵抄出到部送司隨即  
呈堂咨行河南撫按查議酌奏去後今奉本部  
送准該撫樊尚燝回咨內稱行據司府查議到



職會同巡按御史李日宣撫治鄖陽都御史蔣  
允儀看得南陽府以地瘠糧輕致加餉之數比  
正額浮逾二萬民力民情果有難堪前鄖撫計  
窮慮極酌以南陽三萬餘餉攤派于七郡一州  
條上以

請蓋在南陽則惟知有南陽之苦

皇上所以戚戚動念也乃七郡士民力難代納口稱  
偏枯相與控籲于

皇上之前惟我

皇上惻隱興懷輒下部議本部隨仰體

聖衷俯矜民隱復下詢地方之吏無非欲攤派之維  
均民心之允服耳顧惟從前郎撫專轄南陽原  
從南陽起見職等實任全屬不得不從全屬推  
心惟嚙指之皆痛敢偏聽以爲徇伏念今日中  
州之若不獨地瘠而民力之訕不獨三鰲也年  
來水旱頻仍無瘠無肥並罹災沴而河濱之民  
更田廬盡沒重以山陝流寇飄忽叵測西北州  
縣備兵逾年矣茲又登叛倡倣曹濮蠢動致開

歸東防又增二路之師供億征繕竭盡膏血  
之東路多虞人爭趨捷而中州驛站遂屬輪蹄  
之會不啻城門之軌七郡之苦蓋不在南陽下  
也今蒙咨議隨卽廣詢司府再四徃復謂七郡  
遵

旨照畝派已足額矣南陽不能完之分內而欲各府  
州代之分外是豈必得之數乎合無懇祈本部  
俯念中州多事職等苦心特賜題復力爲乞請  
皇上其憐此南陽一郡將三萬有奇之餉特懇

恩免唯命其念此加數太甚考成爲難量請減額唯  
命不然者惟有如藩司之議以南陽應有之分  
數還責之南陽自是正論王土王民義無所逃  
作貢作賦情乃稱平派累一議如七郡所請誠  
戛戛乎難行者望確與議豁庶徵解之考成不  
爲有司累而彼此之爭端不煩本部憂矣等因  
又准鄖陽巡撫蔣允儀咨稱如派遼餉照畝照  
糧各處不同蓋因地制宜使無偏枯之患爲經  
爲緯各有攸當本部行之久矣南陽正糧十二

萬有奇而加餉至踰十三萬雖近奉

聖恩減免裕州唐縣內鄉一萬五千四百九十餘兩而較諸他郡尚浮過半本部題覆業已洞察苦情今續加三釐前撫以宛郡從來疲瘠近益民貧盜起兼值災稔通荒日甚萬不能堪故有照糧之

請派止九千九百四十四兩是因重而哀之使輕非以輕益輕也而照糧所餘之三萬金勢不得不洒派七郡非敢謂七郡民力有餘亦曰衆弊易

舉云耳惟是本鎮止屬南陽而議及不相轄之  
七郡則似乎侵官嫁禍安七郡之不受耳今在  
全省者傷齒指之皆痛在宛郡者悲一人之向  
隅則惟有仰懇

聖恩憐此瘠地俯賜蠲免之一法等因各到部奉批  
新餉司查覆奉此相應議覆案呈到部該臣等  
看得地畝加派原爲畫一之法而改畝照糧不  
過變通之權總期無虧原額輕重適均耳南陽  
府舊派九釐以照畝偏重難堪卽撫梁應澤將

新加三釐條爲照糧之議而以照糧所遺三萬兩派令七府一州代輸其爲宛民請

命額詞甚切臣等因念新加三釐原奉

聖諭云有如此則壤不等法須變通的或照糧數議增或照銀數議增不妨因地制宜但期無失本額此臣部所以仰遵

明命如議覆行亦謂萃之一郡則重散之七郡則輕非有私于南陽也乃七府諸紳劉之鳳等有代累不平之鳴撫按諸臣樊尚燝等有全屬推心

之論乃知昔日卽撫創爲照糧之議者原從南陽起見而未從通省緊矩也今七郡之苦旣不下于南陽則舍已之耘自難強之必任茲三萬有奇之加餉仍應照舊派九釐之例一體照前派徵以足餉額不待再計而決者惟是旣卽之擔而復責之再肩則民情愈覺難勝合應每畝量減一釐俾民終感薄賦之

仁兢勸急公之義而一省群情共免輕重之爭執矣  
再照南陽之南召該臣於四年四月內覆該省



撫按郝土膏李自宣乞免加派少蘇衝疲一疏  
議將該縣新加三釐量免一釐夫既已獨寬於  
先自難槩派于後應于一釐之外再免五毫以  
徼終始培養之

皇仁也通計南陽府屬照舊額增加三釐該銀四萬  
四千五百七兩四錢四分一釐內除南召縣先  
免一釐減銀三百二十一兩二錢四分三釐今  
又再免五毫及各州縣俱量免一釐共減銀一  
萬四千六百七十五兩一錢九分一釐五毫外

實該新增銀二萬九千五百一十一兩六釐五毫所當照數徵解不得通負自于叅罰者也既經具題并查議回咨前來相應酌議覆

請恭候

命下臣部移文各該衙門遵奉施行

崇禎五年七月十二日具題本月十五日奉

聖旨錢糧應有定制這南陽加額攤派屢更及因互爭輒調停量免致虧公課是豈裕餉長策著再行確議奏奪欽此

覆東撫條議寬恤緩徵疏

題爲熟審二東之情形亟陳目前之要著仰祈

睿鑒固安根本以資耆定事專理新餉山東清吏司

案呈崇禎五年六月十八日奉本部送戶科抄

出山東巡撫朱大典題前事條議內開一日瘡

痍之衆空恤東省十餘年來大稜之後繼以蓮

妖而曠潦蝗蝻歲歲見告嗟我子遺喘息未定

復罹登叛之慘被兵之處鋒鏑此備而過兵之

鄉蹂躪喙突其他則輸芻輓粟貼馬幫車日無寧

晷一切置辦供應

朝廷虛坐長令以設處而長令實責闌闌以代償甚  
至敲骨吸髓貼婦賣兒官取其一胥取其一差  
取其一里徧復取其一而其餘斯以及於戎事  
窮則思亂安望賊之樂復爲民而民之不胥化  
爲賊也容臣廉其借公剥民者不時糾叅以甦  
殘息伏望

皇上於舊逋新徵稍分緩急而一切徵調所需計動  
正項支給勿徒以設處二字重困州邑而反開

以漁獵之口實也伏候

聖裁等因崇禎五年六月十六日奉

聖旨東省亟須戡定朱大典受任巡撫卽宜輯民勵  
兵防守策應守令佐領有不堪任用及借公剝民  
的叅處更置至盜賊結聚著速行解散以消弊端  
其特設技勇該部看議具覆欽此欽遵抄部送司  
相應具覆案呈到部該臣等看得東撫朱大典  
受事方新銳意戡定條上五策本標並舉而於  
輯安殘黎以護元氣尤三致意焉信斯言也則

善良有更生之望而反側絕煽惑之端矣所稱  
舊逋新徵稍分緩急臣查東省原非多逋之地  
自登變後一切考成未嘗不留餘地今除新餉  
以剪叛賊舊餉以供九邊俱不容緩外其他一  
切起存本折錢糧伏望

聖明憫茲遺黎暫緩催科以示優恤可耳至征調所  
需許動正項久有成議惟是軍興之事百孔千  
瘡如撫臣所稱輸芻輓粟貼馬幫車等項雖不  
用民而不能不用于民官之用一而百姓之費

百撫臣所陳總關民瘼誠不可不亟爲體悉者也查臣部于本年正月內題覆兵部緊急軍情一疏計東省五年新餉民運等銀除蠲免登州府新舊加派并襍項銀共六萬一百四十餘兩萊州府新增三釐銀一萬五千四百餘兩并分餉解過外尚有七十二萬二千八百六十餘兩議以三十二萬并存庫八萬兩留充剿賊其四十萬移餉招練又于二月內題覆御史王象雲叛兵之猖狂愈甚一疏議于七十二萬內一日

用兵自聽一日支用是臣部留供東省征調之  
需者已盡此七十二萬而全界之矣而勦密昌  
平相繼調遣援萊者行逾月餉往往取給臣部  
則留用之外糜費臣部者又當不貲是臣部仰  
體

皇仁併未嘗以設處二字重困州邑而州邑亦勿借  
口於設處二字重困吾民務於供億軍興之中  
存休養元元之意毋以救民者厲民於以普恩  
膏而奏底定是在撫臣督率有司極力圖之撫



臣執法彈壓操縱在手無慮守令不承風象指  
者斯實目前綏靖救寧之急著也既經具題前  
來相應覆

請恭候

命下臣部移文該省撫按藩司遵奉施行

崇禎五年七月十三日具

題本月十五日奉

聖旨東省錢糧留充剿賊之用其數已多若速行裁  
定尚可節存何得藉口軍興設處科派病民地方

官有貪肆不遵的該撫按叅來重處欽此

覆部科條陳海運興革利弊疏

題爲海運查覈一終謹條應禁應行事宜以維運  
法事專理新餉山東清吏司案呈崇禎五年六  
月二十九日奉本部送戶科抄出本部管理新  
餉右侍郎周士樸會同查覈餉務戶科給事中  
朱國棟題前事條議海運事宜緣繇本年六月  
二十七日奉

聖旨該部看議具覆欽此欽遵抄出到部送司相應  
議覆案呈到部該臣等看得臣同官周士樸於

海運一事娓娓千餘言要其興革之大旨則慎  
委捏澄源之窾越卸滋趨避之機遲報開游移  
之路風變迅查勘之期補還挽邪移之轍在津  
門不任遲悞在關寧不任虧損在船委不任侵  
尅而運務可行所無事矣臣因其說而覆議之  
漕運議單漂流一款立法甚詳海運運弁未引  
以爲例者漕運皆世職而海運則烏合武弁漕  
欠舍旗甲而問運官海欠舍運官而問船戶蓋  
海洋之險百倍內河一遇風波運官船戶漂泊

異地故稽察者運官而肩任者船戶運官之責成亦未嘗不嚴也擇委互結津門具有成例總期運交的當如有漂失卽查勘真僞定船戶之罪案而運弁之罪案亦因而差等之每遇年終考察及餉院出巡輕則朴責重則拿問如有侵欺自有律例不得爲之寬假者也天風越渡海濤不免風定修桅仍空各還信地乃規便闊捷越卽越交兩地收發舛錯無非暗滋影射所當約以法非本信交割者卽有實收不准銷筭或

查覈明實仍量減水脚其零星帶交找補原欠者照舊准行若不交于原欠之處而反交于不欠之處則又與越節者同例也海洋風颶日且不測小民輕身涉險走利如驚所謂以愚之道使之也一遇失風或人船胥溺或棄米圖存勢所不免乘機假捏保無一二但論真與不真耳津門舊於真正失風槩置不問臣撫津時初議追糧三分闔幫與本船各賠一半每苦追賠難結隨經題定扣船戶水脚六分以稍償損失追

水舵工價六分以筭抵脚價船戶稍寬易完在  
官亦爲實際立法已久人心已帖然矣但上以  
險恤之下卽以險托之情弊萬狀止有一勘實  
之法在倘遇風變卽申沿海所在官司委官查  
勘其結轉報督部餉道果係的實則有前例可  
援如有情弊則又盡數追償盡法追究者也至  
失落無多應銷應賠督部徑自酌行咨部知會  
津門歲定三運運一

奏報年一

奏繳而報部冊亦如之乃餉司收數混入月報之中不另行報部掛欠多少稽覈何從頒令津門餉道每一運起完卽一發冊報部則發數達部矣各鎮餉司每一運收完卽一收冊報部則收數達部矣從中交覈之而收發掛欠歷如指掌奸委船戶不得播弄機關年終

奏繳止一成數具題與

奏報何異况又復過時也今議及時

奏繳備將發數收數完數欠數應銷應追

一



別開列下臣部覆覈則年有定案自不至貽葛  
藤于後日矣各鎮掛欠例應津門追補乃下脚  
之扣留船委之賠補者津門竟忘其爲各鎮原  
欠之物也以後凡津門追扣者一一報部解補  
各鎮以足預計之額不得一任挪移令各鎮受  
其損而津門反受其益也運之遲速船委事卽  
餉道事收之遲速廳委事卽餉司事逗遛需索  
之弊餉道繩船委督部卽以繩餉道餉司繩廳  
委臣部卽以繩餉司督累而廻環于三運之中

何慮海運之不濟也津門一督部一餉道一贊  
司共事海運法無不盡數年來撥派截留調度  
不一逆奴叛孽變出非嘗收發參差職是故耳  
今經部科諸臣悉心石畫於閃爍麗雜之中尋  
關防整頓之著一煥舊章遂著新猷而有事運  
務者惕于已往之錮轍悚于方新之

功令人共易其精神庶海運頓換一光景乎既經  
會題前來相應議覆恭候

命下臣部移文各該衙門遵奉施行

崇禎五年七月十五日具

題本月十八日奉

聖旨這查覈海運事因處置亦悉卽飭各該管官著  
實舉行欽此

覆陝西吳按院議留公費賞功疏

題爲因新舊兩餉之訕體中外急公之心仰祈  
聖明申飭裁定撫按協濟銀兩務期全完以克實用  
事專理新餉山東清吏司案呈崇禎五年七月  
十三日奉本部送戶科抄出巡按陝西監察御史  
吳牲題前事議將本衙門奏解公費新餉銀  
二千三百二十兩留充延安賞功支用其派解  
不敷銀六百八十兩無從湊解免行註欠查追  
俟事平之後仍照原額解部等因本年七月

一日奉

聖旨該部知道欽此欽遵抄出到部送司相應謹  
奏呈到部該臣等看得新餉於加派襍項外  
有撫按公費一項以佐不足秦省巡按額餉  
費銀三千兩歲解不缺今按臣吳牲議將五  
分見奏公費二千三百二十兩留充延安賞  
支用仍免其不敷銀六百八十兩俟事平照  
解部一爲軍前鼓敵懷一爲地方恤物力雖  
項業算新餉入數賞功非臣部職掌然而

同舟臣部方不恤多金除蠲俸加派銀入糶  
千三十九兩外題留正祿新餉二十六萬有奇  
以供該省勦賊兵餉之需區區公費又何敢  
分畛域而復有新焉聽其留用可也卽不敷銀  
六百八十兩按臣吳姓旣躬簡約與民休息又  
以廉之一字爲有司倡憫茲荒盜予遺不忍以  
科贖重困是亦

聖明所矜允也今議併與暫免至新按臣仍當如額  
按年解部以覓新餉不得援以爲例者也旣

具題前來相應覆

請恭候

命下臣部移文都察院轉行該按臣遵奉施行

崇禎五年七月十八日具題本月二十一日奉

聖旨是

題再剖三年豆折存積之虛疏

題爲再剖三年豆折存積之虛并酌議向後扣除  
奏繳之例以祈

聖裁事該臣部題爲遵

旨明白自行回

奏事覆關外豆折緣繇本年七月十三日奉

聖旨豆折一項三年節存便有二十二萬餘金其他  
豈無減省至蠲免題留行鹽等項亦可歲計所出  
何嘗日溢况稟稱通融補湊錢糧頭緒何繇清楚



前有旨着積贏餘以備大用何乃有缺卽呼有存  
不報着該司官回將話來欽此欽遵除司官郎中  
張鵬翀另疏回

奏外臣竊惟錢糧一出一入頭緒原期清楚臣部  
計出計入款項亦須相當不足則請諸

皇上有餘則還諸

皇上誰敢不冰兢從事者卽如寧遠鎮三四五年豆  
折二十二萬餘兩未發卽爲扣存扣存卽應

奏報

皇上之所求于臣部者固理之正也然扣者扣之人  
額所有不能扣之人額所無存者存諸出額所  
餘不能存諸出額所縮則臣等請再一合盤通  
算之憶二年己巳臣部屈指新餉大數出浮于  
入缺額至一百二十餘萬因將省直雜項再四  
駁查始有定額出入差足相當乃甫行申飭而  
虜薄城下百費鱗集矣三年防援蜩集行月冗  
支出浮于入尚缺額一百六十萬臣又仰請

睿斷權宜加派每畝三厘議扣生員優免僅可支撐

無扣存也四年六月以前援兵悉如其舊六月以後

皇上深惟冗濫議將防援兵將可撤者撤可併者併臣部仰幸

寬裕而壓欠兵餉俱改見月未免大費益復不貲是四年亦無可扣存也且當軍興窘迫之時臣等不難大聲疾呼亦賴

皇上有呼卽應不一而足通計三年正月九月十一月三次共借過

內帑太倉輕齎等銀四十一萬四年四月七月兩次共借過老庫輕齎漕折京糧太僕光祿等銀三十五萬真是剝肉醫瘡原非四應立辦而欲絕無通融其將能乎五年春月經制既定雖意外增費頗亦難料而出入相準似有贏餘故臣部開具出入大數奉有

明旨積存贏餘以備大用然亦須俟歲終打算未敢懸爲畫定且亦不能預扣于未奉

明旨之前也何也凡錢糧實在貯庫方可言扣存方

敢以入

告新庫五日一 奏報歲終一 奏陳歷歷

御前有存無存何能欺我

皇上無存而虛作扣無論臣部之涉于罔

皇上亦安取此紙上之虛數爲者且三四年原借銀

兩除補還外仍有輕賁漕折尚未盡還則其應

存之數寡矣臣部不敢以預計不發者博節省

之名而那緩以就急那虛以應實但求新庫錢

糧實有着落邊鎮經費幸無虧延而止實不暇

虛爲扣存以致

明旨之詰問則臣部一時之疎漏也儻自今以往災  
侵無聞寇亂就息請自五年爲始千歲終月餉  
通完日明開已題未發銀若干如果存庫卽貯  
以待大用歲以爲嘗若必欲邇求三四兩年應  
存之數則有三四兩年省直尚欠新餉加派襍  
項銀共六十餘萬兩俱積逋難完之數亦可虛  
作扣存有完解者分別另貯或亦可仰副

皇上積餘備用之至計也至于臣部向來一應錢糧

止報已發不報未發沿習日久今經

皇上一番詰問如夢斯覺臣部繇此申飭率屬以幸  
無罪則又非該司官所能創例徑行者矣伏惟  
聖明鑒察策勵焉臣等曷勝悚亥待

命之至

崇禎五年七月十九日具題本月二十五日奉  
聖旨前部具出入大數原有贏餘即使緩急那移亦  
湏明白開報如豆折一項抵充何用頭緒既易濫  
楚邊臣糜節亦自了然何得一槩濶朦豈大臣飭

屬裕儲之誼以後俱着歲終詳開出入原額及溢  
存二項具奏其三四年省直積逋催解另貯依議  
行欽此



同兵部會覆津撫酌運島糧疏

題爲海運九月停止謹再請

聖斷以決機宜事專理新餉司職方清吏司案呈崇  
禎五年七月十六日奉本部送戶科抄出津部  
鄭宗周題前事內開天下有言之甚易而行之  
甚難者則今日之島運是也准戶部咨覆該臣  
具題爲海運時日有限鮮糧督發難專等事崇  
禎五年七月初一日奉

聖旨島兵效順糧運自當照例接濟今情形未見的

報額數亦難懸揣本內指陳諸款悉中機宜係議  
著黃龍確查實情若何定額若干積貯給發併鼓  
舞各兵協勦何狀詳明速奏以便酌濟其運升往  
來有何聞見也著鄭宗周據實陳奏欽此欽遵移  
咨到臣臣愚昧無知就中機宜殊非黠淺能測  
惟是

絲綸一布堅如金石運期有定信於四時而島糧發  
運實關天下安危大機則臣不得不再補牘以

請

聖斷部咨云島人效順者固多從逆者亦不少固也  
情形未見的報乃金聲桓堅意殺賊及各島衆  
不肯從叛忠義可嘉非三月二十九日之

勇言乎黃龍輯島扼防勵銳拒賊准復原官王良臣  
等俱依議給銜用示鼓勵又非五月十四日之  
勇言乎書曰大哉

王言一哉

王心又曰任賢勿貳夫馭得其道則徂詐咸作使而  
持不斷之意二三若此臣恐天下有以窺

廟筭之淺深也從靛關鮮海連來以三月清明起九月重陽止蓋秋高風猛鯨鯢鼓浪則覆舟必多卽

天不能違而況於人乎部咨云秋濤洶湧亦不過止重陽前後數日餘尚可揚帆也當每月量發五千石敬遵部咨是十月不虞履霜十一月十二月不虞凍阻正月二月不俟冰泮皆可每月揚帆耶皆可量發五千石耶不特此也鮮運海面遼遠中多險阻當以三月裝糧四月開船五月抵

鮮六月回空一年止可一次九月以後斷不可  
行蓋以累年失事多在重陽前後若逆

天時誤軍機失人心異日島中缺糧致有他虞臣不任  
受乞

皇上今日

天語明言寬臣之罪其他機宜臣不敢一一深言事  
關安危詎難緘嘿伏乞

勅部覆議海運應否九月停止島糧應否發運若干  
確示畫一以便及時轉輸臣職在督餉他非所

敢知也等因本年七月十六日酉時奉

聖旨昂糧以贍兵資剿前戶部說分別順逆酌定額數亦慎重有見這本危詞呼籲至每年一運又與部疏迥殊著再會同兵部確議速奏欽此欽遵到部送司案查本年七月初七日據東江總兵官黃龍呈爲亟請措發餉銀以揚敵愾事內開海外官兵廩餉向年於登府掛號支領蓋係東省之額餉也自登叛發難以來于茲半年餘矣糧餉久絕前蒙

富宁軫念已經立發津糧接濟今取據坐營官開造  
各島營實在官兵一萬四千七百有零除每名  
給米一斛外各支不等月該半餉銀一萬七百  
九十餘兩據實造送以期速發至于職衙門經  
制俸糧自四年九月經坐營邵國祚通支四年  
十月以後至五年六個月曾無支領并隨任遺  
島川湖南兵三百二員名遺島招練遼兵三百  
二員名其額給廩糧與島餉者不等俱令據實  
造請總乞本部體念省餉不贍立賜那發統俟

於東省額餉內扣筭等因奉批津門發過糧運  
差官歷能口之乃文內不及一字何也所請折  
色兵餉新餉司查議具題奉此又據總兵黃龍  
呈爲再報收集船隻兵丁事內開蒙山東督師  
劉部院憲牌發米豆一千七百石并查發淮河  
口先經遊擊彭應明帶去載兵沙唬船二十七  
號并本管在島原船七隻共計官目兵七百五  
員名隱然已成一水營則於各島營官兵一萬  
五千三百四十二員名之外又多一水營官兵



七百五員名也各船多係登船各兵額餉仍應  
請於山東省餉內除再詳山東部院請給餉銀  
仍乞本部咨會以便速行措發等因又准兵部  
咨同前事俱批送到司相應併議具題案呈到  
部該臣等會同兵部尚書熊明遇等會看得登  
叛未殄必招搖島衆爲羽翼必攀附諸島爲窟  
窟據登其進步竄海其退步此有識者所能料  
也沿海扼要以窮歸路于東江有厚望焉撫綏  
島兵以鼓用命誠不煩再計者津撫謂關安危

大機誠未爲無見也但海外之事波濤森落事  
難遙度前鎮臣黃龍自稱糾集島兵七千以守  
旅順今報又稱官兵一萬五千似覺極處及審  
黃龍差官沈璽并津門差官韓玉立張世英似  
謂旅順之外仍有分隸各島者臣等不敢斥以  
爲非然亦不敢遽以爲實然也故按額取盈臣  
等不得不斟酌其間一則恐島糧多積萬一登  
叛垂涎則誨盜可虞也一則恐賊船出沒萬一  
中流被掠則資盜可虞也故于接濟之中不廢

防範之意通俟登事旦夕勦定便可照嘗過發  
耳頃讀津撫急籌護運一疏亦云登叛日久食  
窮四逸擄掠欲請大砲火器等項以防糧艘豈  
關運所在不測而鮮運一往安瀾乎一年一運  
者在平嘗無事之日則然事處倥傯自難膠柱  
鼓瑟卽津撫已發之三萬亦係陸續戒行分作  
四次未嘗拘一運之例也臣前疏所云止避重  
陽前後其餘皆可揚帆第指三秋而言舊例重  
陽以後不廢輓輸津撫遂以履霜堅冰之說屈

之耶且恐秋深遇颶又恐冬月乏糧大都皆從  
職掌上起見而未嘗以叛賊狡詐事變叵測之  
情形細爲揆度耳至黃龍之所急請者又不專  
在本色而兼索折色矣查島餉向在東省俱係  
登撫爲政自省餉已經題留鮮運改繇天津則  
島餉所需折色俱在東省留餉七十二萬之中  
所需本色俱在天津鮮運六萬六千之中登撫  
謝璉向被圍困督臣劉宇烈見在青萊之間東  
江機空并聽節制查督臣已發沿河米豆一千

七百石關門復發米三千石津運已發過米三萬石矣而該鎮猶不勝懸望之情迫切之狀據冊開島兵一萬四千七百人計口授餐每月該米五斗銀七錢也川湖南兵招練遼兵六百餘人皆照登例食大餉者也督臣新發水兵七百餘人各有舊例又額外待支者也訛言偶語月費安輯復據運弁韓玉立張世英亦稱黃龍屬兵旅順以待果爾則本折所需亦不貲矣但客歲島中折餉原在登餉支領今臣部新餉因兩

潦後外解不繼無論力不能發卽發亦非例也  
黃帥文內稱折餉自去年十月未領查罪撫孫  
元化冊開島餉發至年終及審差官亦稱斷自  
今年正月爲始督臣咫尺海上偵探必確請  
勅督臣查明島兵新舊實是若干應給折色月餉幾  
何卽于東省留餉酌量給發據實奏

聞津撫旣恐失時候運乘此初秋再發鮮運二萬石  
以資海外之接濟但須申飭運官船戶加意防  
範如其所以備關寧者務在保無疎虞則善矣

此外僅存萬餘石卽姑儲留備用可也屈指登  
叛釜底遊魂轉盼撲滅則東江一旅當必別有  
規畫再定經制於以資秣厲而防漏卮無容臣  
等鯁鯁過計爲矣旣經題呈前來相應合議覆  
請恭候

命下移文登津督撫并行島鎮遵奉施行

崇禎五年七月二十日具

題本月二十六日奉

聖旨島糧折色著朱大典於山東留餉內酌給本色

米乘今秋氣未深著鄭宗周如數發運接濟仍嚴  
飭運官加意防範毋致疎虞



覆四年分鮮運事竣疏

題爲鮮運事竣謹遵例

奏繳事專理新餉山東清吏司案呈崇禎五年六月初二日奉本部送戶科抄出天津部院鄭宗周題前事

奏繳崇禎四年分運發過鮮糧數目緣繇本年五月二十九日奉

聖旨戶部知道欽此又該督餉御史王邦柱會題前事六月初三日奉

聖旨戶部知道欽此欽遵抄出到部送司相應覈覆  
案呈到部該臣等看得鮮運之役從汪洋巨浸  
中水輓數千里而遙較之關運倍爲險阻颶風  
怒號頃刻叵測故自開運以來十到八九便足  
爲功非寬假也今按督餉津部鄭宗周御史王  
邦柱

奏繳一疏而覆覈之計崇禎四年額該鮮糧六萬  
八千石除三年多運九千五百二十二石實該  
運米五萬八千四百七十八石恐不敷用又議

預運六千石共計運發過東江米六萬四千四百七十八石內已獲實收者五萬八千五百八十七石五斗掛欠五石追銀五兩抵補外失風米五千八百八十五石五斗內船戶傳文卷九百石耿銀九百九十石劉天祥八百五十石俱係桅折船傷淹歿水手王三傑等共一十五名查有確據並印照可憑既經前撫瞿鳳翀查明詳允開銷似應免其究追其餘如船戶劉國用辱失米二百一十二石臯陞辱失米一百一十

六石五斗遇颶辱失是矣然止有同知賈名傑  
之印照未顯作何查勘且查關運辱糧舊例二  
百石以上照糧數每石全追腳價二錢一百石  
以上每石量追糧價三錢則劉國用當追銀四  
十二兩四錢臬陞當追銀三十四兩九錢五分  
是亦未可輕貸者也又徐富裝糧九百石遇颶  
傷船糧盡漂沒是矣然所云淹死水手二名並  
無姓名恐非確據如董廷春裝糧八百五十五  
石據稱遇颶將船打碎淮河口糧石漂沒夫淮

河口非大海無際者豈人皆無恙而一船米石盡付逝波而顆粒莫救耶又董養林稊稱遭颶刮至趙家沙上遇淺閣破船板辱失米二百八十五石夫既稱辱失則有追賠腳價之例但適遭兵叛董廷春被戮董養林被擄俱已不可問果信然耶抑猶有家屬可追耶以上三項不可不再一詳議者也又顧昇裝糧七百七十七石稊本運官羅元霖幫長郭世榮等供稱人船沉沒雖未親見但海中桅杆漂沒丈尺式樣知爲

昇船無疑揣摩臆度之說疑出扶同飾詐之詞  
而人船俱已無踪不得不姑准開銷者也然船  
戶有被擄被戮之不齊而運弁有典守之責亦  
當根究戒飭以警溺職者也至于三年分掛欠  
米二百八十七石一斗除交過一百五十石一  
斗獲有實收馬貴名下掛欠十石業已追完俟  
帶交外尚有船戶姚壽一百二十七石未完當  
在追補之列不知何以人產全無議請開銷似  
當姑與量免三分之二而追其一可也再照津

門漂失之例其人船覆沒者無論矣若船戶水  
舵尚在者船戶應扣六分水脚水舵應扣六分  
工價少償損失昔年曾經題

請奉有

欽依仍當照例查扣不在開銷之數應行津撫查明  
所扣數目報部作正支銷者也再查津門冊開  
三年分派運關外船戶楊大道越卽皮島豆三  
百石四年分津撫

奏繳關運事竣疏開船戶查承運越卽旅順米五

百零五石以上共越卹米豆八百零五石此疏  
未經載入相應拈出于五年鮮運數內一併銷  
筭者也既經

奏繳前來相應議覆恭候

命下臣部移咨津撫并行餉道遵奉施行

崇禎五年七月二十六日具

題八月初一日奉

聖旨奏內海運漂失應開銷的准與開銷其餘查勘  
量追及扣除水腳土價越卹一併銷算運官根究



戒飭等事俱依議著嚴飭行欽此

覆給島兵布花疏

題爲節奉禁海

明旨海道肅清敬陳島兵寒苦迫期請明措處布花  
以溥

皇仁事專理新餉山東清吏司案呈崇禎五年七月  
二十二日奉本部送戶科抄出東江總兵官黃  
龍奏前事內開布花鞋帽皮襖靴皮島兵所必  
需者非奉

明旨勅下雖具文關津請乞從權運濟又誰敢蹈違

禁之愆越海而出者伏乞

皇上念海戍風寒特施法外

殊恩或

新下內部查發准作正餉銷筭或

勅津萊海口與監視衙門除希違禁私貨查出立行

正法外許令從便買運布花接濟等因本年七

月二十一日奉

聖旨該部知道欽此欽遵抄部送司相應酌議具覆  
案呈到部該臣等看得各島孤懸海外不織而

衣

國家有事登州方欲倚爲犄角則卒歲之計亦當  
代爲之地也昔因用島而海禁弛今因禁海而  
島境肅若復通商而弛禁平時猶有微漸之防  
况多事之秋乎此事兵部主之非臣部所敢越  
俎也然海戍風高祁寒可念布花之類授衣必  
需查天津鮮運在天啓年間及崇禎元年每歲  
帶解青白藍黃布二萬疋臣部給價天津買運  
崇禎二年因兵糧減定布疋亦減十分之二止

唐書卷一百一十五  
帶布一萬六千疋約費銀四千餘兩三年四年  
登撫設鎮津門遂不復運矣今議量給舊額一  
半該布一萬疋若花則舊例所無如

朝廷鼓同袍之氣而施挾纘之恩特給一萬斤亦不  
爲濫伏乞

勅下臣部亟行津部置買色布一萬疋淨花一萬斤  
俱於糧艘帶運務須卽交的當取鎮臣黃龍實  
收繳部銷筭如不足用聽鎮臣黃龍差官賫文  
移會東撫在於山東附近地方亦照前數買用

卽作正餉銷筭但須詳行稽查不許借端興販  
以疎海防朕用島與禁海張弛各不相妨矣旣  
經具奏前來相應覆

請恭候

命下臣部移文津部東撫并各該司道及東江鎮臣  
遵奉施行

崇禎五年七月二十七日具

題八月初一日奉

聖旨依議欽此

覆宋吏科萊陽久守接濟登餉疏

題爲萊州之圍勢窮未解萊陽之守力竭不支伏  
乞

皇上俯賜乾斷亟爲救拯以奠封疆事專理新餉山  
東清吏司案呈崇禎五年七月二十六日奉本  
部送戶科封送蒙

御前發下紅本吏科署科事給事中宋玖題前事內  
開萊陽久守孤窮人心憤盈可用乞

勅戶部移文山東撫臣於登餉額內酌量兵數速爲

接濟等緣縣奉

聖旨該部看議具奏欽此欽遵到部送司相應酌議  
具覆案呈到部該臣等看得萊州控兩淮之咽喉扼全齊之肩背苦守六月幾乎斷送賊手今當撫局敗壞銳意收拾卽從敕萊始於此肅定脚根步步向前自足困賊不止暫紓目前之困已也而萊陽一縣又犄角萊州屏蔽膠寧實濱海最要區也當登賊初獮所在披靡知縣梁衡鳩衆合武攔城自固屹然孤峙迨道臣宋之偶



慷慨任戰威望著服入劄萊陽衆始倚若長城  
矣五月十四日賊以馬步數千合圍而來恣意  
睥睨目無百雉乃乘埤守障言言難犯復縋城  
斬馘使賊剝剝以遁壯哉此舉科臣請爲紀錄  
俟容兵部酌行非臣部所得越俎也但以三里  
之城聚族而處攢食難繼萬一大姓貲盡小姓  
力竭賊復乘之前功不足恃矣而隸籍材官者  
又專恃

公家之豢養道臣不知領餉幾何想阻守數月宿

飽維難夫旣共事剿援則道臣之兵卽東省之  
兵道臣之餉卽東省之餉宜

勅撫臣於留餉內速行酌量給發接濟者也查東省  
原留新餉七十二萬題留之後又續解到部三  
萬九千四百四十四兩蓋起解在先而奉文在  
後者止實留六十八萬有餘但風鶴之際催科  
未必響應逼賊之衝征輸奪於堅壁卽此數亦  
難取盈矣近日島兵復索折色所需亦屬不貲  
查該省生員優免銀除登州外仍有四萬餘兩

原不在題留數內宜盡付東省以足原題之數  
以供勦援之圖庶着着應手不難於出奇而制  
勝乎非海之風夙稱仗義今上者狎寇下者附  
寇固出途窮亦繇風偃若打起辦賊之精神卽  
撥轉從賊之意向從茲聯屬鼓舞當更無剩義  
矣旣經具題前來相應覆

請恭候

命下臣部移文東省撫按及藩司遵奉施行

崇禎五年七月二十九日具題八月初二日奉

聖旨依議欽此

查覆入援黔兵支過餉銀疏

題爲巡視事新舊兩餉司案呈崇禎五年七月十五日奉本部送戶科抄出

皇城巡視工科等衙門右給事中等官王家彥等題  
前事內開據金吾左衛指揮何牙稟稱本月初四日

東華門外左邊男子一名秦耀祖跳入河內當有軍人救出未死等情到臣臣等卽批該總查明回報去後隨據左東把總孟承寵稟稱有狀一

紙卽將本犯帶至鼓廳臣等親詣面鞠據狀內  
稱係湖廣辰州衛人告爲狼侵

國餉買姦誤命事殺害數次原日曾經代州太府  
衙門山西巡撫前有奸官林耀原總鎮胡從儀  
存剩餉銀三千六百九十四兩三錢鎮主原日  
病重要將此銀繳部鎮主沒後就被林耀鍾鳴  
將侵分入袋耀祖原見此餉二官就起狼心恐  
耀祖說出明害暗殺數次得天人共救只得告  
稟二衙門告明奔京申屈要行告奔又被鍾鳴

將在京買奸圈阻此時良善之民被人計殺急  
情上告東廠衙門計開林耀鍾鳴將陳文玉証  
本京買奸四名見在本府館內賞差拏究等情  
又審稱崇禎二年往貴州跟總兵胡從儀一年  
半打雜答應比從儀有存剩餉銀三千六百餘  
兩盛兩鞘一箱同中軍鍾鳴將戴罪立功守備  
林耀押解前銀繳部三年十月解銀來京到彰  
義門外天寧寺對門觀音庵內住從儀病重次  
在庵內二官遂將前銀瓜分又新餉一萬兩剩

二千兩係鍾鳴將侵匿四年耀祖卽跟林耀往  
山西征流賊彼時鍾鳴將俱往山西林鍾二官  
懼耀祖知侵銀緣繇明害暗殺數次就買付文  
耀送帽一頂青布表一件其衣有邪術在上就  
害及臨身有一長老說被我丟衣未穿去年四  
月取河曲縣就轉山西十六個月未領餉到宜  
府鍾鳴將又差我往偏關下書林官留住不放  
不知何讎何冤就暗害我汾陽縣賈知縣將耀  
祖監禁申宋撫院說南人不是盜不是賊賞銀



二錢發回我來京欲申訴力弱不敢只得寫報  
度日已經三箇月有人屢屢說破他們將你做  
功報大相來十四五日就要殺剮你衆人說過  
准在今日情急只得來東廠申訴又怕打就投  
水臣等因執詞不一於次日枸鍾鳴將同赴公  
所研審據鍾鳴將供稱胡從儀原領貴州官軍  
二千四百員名入援帶領本省餉銀一萬一千  
五百兩至保定給完於崇禎三年十月十四日  
到京兵部梁尚書于十六日點驗從儀于十月

二十一日將前銀銷筭差官陳振道繳冊到臬  
州朱總督訖從儀于十一月初七日身歿其官  
兵兵部委林耀帶管赴山西征剿流賊恢復河  
曲今林耀見在山西岢嵐道周鴻圖留用鴻將  
發回移咨兵部其官軍饒勲帶赴山海耀祖久  
係風癩辰州會館人人皆知又喚耀祖細審侵  
餉等情據稱從儀歿時將銀擺地標封鎖記委  
有二鞘一箱再問耀祖既在林耀名下如何脫  
伍回京據說林耀鳴將要害我十數次我情極

割下髮稍鳴冤於汾陽縣監七日釋放因見時  
嘗有百餘人跟殺我遂跑來京等情該臣等看  
得冒餉大蠹也况侵沒至五千餘金乎據秦耀  
祖所告狀詞臣等不勝愕異至面鞫之口稱所  
解之銀兩鞘一箱則似有其事矣二弁侵分于  
天寧寺對門之觀音庵則似有其地矣乃再扣  
其顛末則一片嚳語不倫不脊豈其代三軍而  
發憤髮短心長抑或爲陣逃之亡命罪重魂悸  
禁門何地而敢闖入

禁河無逼而故自投伏乞

勅下該部查明解餉根因果二弁之侵匿有據自應  
依律正法若或事屬妄規則應得之罪不能爲  
本犯寬也燕山左衛指揮張光爵伍長侯忠等  
守衛疎虞統乞

勅下臣等懲處等因本年七月十三日奉

聖旨據稱胡從儀餉銀于保定給完繳冊貴州總督  
曾否報部銷筭著卽查明具奏秦耀祖著法司究  
問張光爵等照例懲處鍾鳴將係職官未經奉旨

何遽拘審王家彥等自行回奏該衙門知道欽此  
欽遵刑科外抄到部送司案查貴州總兵胡從  
儀領兵二千四百員名馬二百匹于崇禎三年  
十月十四日到京准兵部咨文自到京日爲始  
除行米料草照例查給外給與月餉兩月共銀  
六千九百二十七兩又領布花銀一千一百五  
十四兩五錢見催黔省解補又領米豆折銀三  
百三十兩六錢二分四釐原係扣日支給繼而  
奉調山西征勦此兵屬加銜遊擊林耀復調川

將饒勲領兵二百六十員名赴晉合營勦賊統  
理其事官兵廩餉皆係饒林二弁各自支給四  
年七月宣大總督岑毓英道周馥圖呈稱饒  
勲在宣軍餉銀一萬四千六百餘兩等因到  
部該本部題爲查核撥兵兩地支糧等事一疏  
統將饒勲林耀在部在宣并多支餉銀通盤打  
算共實支銀四萬四千四十七兩九錢七分五  
釐自三年十二月十四日起扣至四年五月終  
止除應得廩餉外多銀三百七十五兩七錢七

分五釐抵筭六月以後防宣月餉因該營又已  
在宣支過六月之餉將多支銀兩議作七月以  
後月餉倘有係饒勲乾沒者追出還官仍充兵  
餉等因四年七月二十九日題奉

聖旨饒勲透支餉銀截日扣除內有乾沒實跡勘明  
併議其改支減額事情該督撫酌妥具奏欽此通  
行去後本年八月續該本部覆宣府巡撫沈榮  
題爲軍務事八月二十六日奉

聖旨這發過黔兵月餉知道了其饒勲林耀互訐尅

餉事情著該督撫作速勘明嚴追奏奪欽此通行  
併節催在案未據奏結其胡從儀原帶領貴州  
餉銀查崇禎三年九月朔五日准黔督咨開胡  
從儀請兵一千名價餉一萬五千兩卽那湊得  
黔庫銀三千五百兩又於沅庫支一千五百兩  
荊州總支一萬兩卽檄催六月二十八日起程  
兼行等因在案並未報有路途支銷文冊今於  
崇禎五年七月二十三日奉本部送准兵部咨  
同前事內開崇禎三年十月二十六日據該鎮



呈爲請給餉銀事內稱本職奉調帶領黔兵二千四百員名戰馬二百匹自本年七月初二日在黔起程于十月十四日抵京約一百餘日共領餉銀一萬一千五百兩係各官兵在黔歷過崇禎二年十月起至本年四月止以前口糧沿途隨散隨用並無分釐行糧到京見劄張儀門外已經一十二日隨蒙給發犒賞銀每兵五錢久行之兵到手一空相應呈請照各鎮官兵賞給月餉聽令遣發等情到部隨經咨會戶部照

例接濟在案及查崇禎四年九月間該黔督  
爲彙造收支楚省協黔兵餉等事并造有清冊  
到部內開一貴州布政司冊報崇禎三年六月  
二十七日奉憲票支銀三千兩給差官吳崇階  
解交胡從儀支給入衛官兵行糧并兩營官兵  
月餉又准該鎮差官華杰是嚴林耀年應朝二  
營官兵補支二年九月分餉銀五百兩二項共  
實支司庫銀三千五百兩支領解給官兵訖一  
湖廣督餉道冊報崇禎三年七月初九日據展

州府兵糧同知張胤復奉督餉道牌奉部院牌  
動支沅庫餉銀一千五百兩給總兵胡從儀轉  
給入衛官兵糧餉訖一湖廣督餉道冊報崇禎  
三年八月十四日據荊州府呈報奉部院憲牌  
動支三年分新餉銀一萬兩給總兵胡從儀支  
散入衛官兵糧餉訖是總計三項共領過餉銀  
一萬五千兩矣而胡鎮止報一萬一千五百兩  
比總督報數少三千五百者蓋將貴州布政司  
所報崇禎三年六月所付差官吳崇階行糧月

餉三千兩并續報差官華杰補支二年九月  
銀五百兩共三千五百之數胡鎮未嘗開報是  
以多寡互異且鎮報與總督冊報止有總數而  
無散數有無乾沒情弊本部不能踰度錢糧事  
隸戶部相應咨會戶部查明徑自具奏等因移  
咨到部奉批新餉司速行查明具覆奉此相應  
一併題覆案呈到部該臣等看得胡從儀領兵  
二千四百員名自黔入援於三年十月十四日  
抵京兵部移文督催且以並無分釐行糧到京

爲言臣部卽以抵京日爲始扣至十二月十三日止給銀六千九百二十七兩以作兩月之餉繼此以往則林耀饒勲接管支給之日與從儀無與也自此林耀領兵入晉征勦流賊遂與川將饒勲互訐見在查勘未結惟是本省帶領銀兩簡查督臣咨報與餉道藩司冊報原開三項共發過銀一萬五千兩而從儀冊報與鍾鳴將供稱俱云一萬一千五百兩者蓋單指荊州之一萬與沅庫之一千五百兩而言未及吳崇階

所解之三千與華杰所領之五百兩也夫華杰之五百兩係補支二年九月餉銀不入數內猶有說也若吳崇階之三千兩原係入衛行糧并兩營月餉豈得盡漏不報其途中作何支銷有無存剩皆不可知今據秦耀祖稱胡從儀存剩餉銀三千六百九十四兩三錢原欲將此銀繳部後被林耀鍾鳴將侵分入已豈從儀領兵抵京之日卽病歟危篤不日其公移冊報皆有不

能自主者而前獎或不盡無乎前此屢經摘發

正在查核今得秦耀祖之訐奏叅以督臣餉道  
之原冊則侵冒之弊已大露端倪矣又云新餉  
一萬兩剩銀二千係鍾鳴將侵匿似卽在部發  
六千九百有奇之月餉及布花米折之內猶剩  
有此數者此惟各將知之尤難以懸斷也據狀  
所指則是林耀千饒勲互訐侵冒之外又多此  
一枝節者今林耀見在尙嵐台無

勅下法司行提前來與鍾鳴將秦耀祖對質果有侵  
冒前弊從重正罪饒勲見在關門頗有軍旅之

寄但前事亦久懸不結合無俟各犯到日并提  
家屬一審以完互許之案其在黔在途支領始  
末除法司追究外再

勅貴州總督速一銷案奏

奪賤錢糧清楚禁稱知儆矣既經題咨前來相應覆  
請恭候

命下臣部移文各該衙門遵奉速結施行

崇禎五年八月初四日具

題本月初十日奉



聖旨林耀及饒勲家屬依議行提對質除餉著該督  
銷筭具奏欽此

覆山永巡撫查補原借銀兩疏

題爲庫貯各項匱乏亟

請緊要錢糧以濟急需事新舊二餉司案呈崇禎五  
年八月初二日奉本部送戶科抄出山永巡撫  
楊嗣昌題前事內稱奴酋未滅兵革未寧門門  
買馬造器犒賞三者欲省之而不得省也臣前  
具重鎮軍需無措一疏東協四路缺馬一疏皆  
首急永平而次及于關如永鎮額餉借過軍需  
一萬四千五百餘兩前鋒路費月餉借過軍需

三千四百兩乃工部原解之物應在戶部項下  
取還臣未敢爲無端之索也又如永平府屬  
州縣應解太僕寺本色馬四百六十二匹應解  
薊永買馬折色銀一萬一千八十八兩乃臣  
歲派之資乞留本屬四路買馬臣十敢爲分外  
之求也而今候覆日久不敢激聒頻催則買馬  
製器姑且束手以待矣至于賞功銀兩臣未知  
宜出何部第于五月二十五日拜疏權

請三萬以濟急需不致日而有援萊防宜之事一切

軍興取用如餉部之無馬丁銀監視之新軍  
銀又皆那借一空矣是豈衛邊緩急一毫無  
取資也哉惟乞

勅下該部鑒臣三疏早賜速發接濟目前其以後  
無長策容臣另商等因本年八月初一日奉

聖旨該部酌議速奏欽此欽遵抄部送司案查奉  
五月內該撫題爲重鎮軍需無措等事奉

聖旨戶部查議具覆欽此查得前銀借用日久因何  
至今方行請補已經創行永平等餉司卽齊

項原借銀兩委係某路某官某人某年月日  
領某項銀若干共若干有何的據今應于某  
銀內補還以前有無銷筭勿得混冒逐一查  
報部以憑具覆等因去後業經兩次劄行山  
二餉司查報尚未回覆今復經該撫續題前  
奉

旨下部速奏內買馬賞功銀兩事隸兵部原應太  
寺給發已經移咨徑自具覆外其新舊餉銀  
開庫銀共一萬七千餘兩必俟山海永平二

司查明到部方可議補擬合先行具覆案呈到  
部該臣等看得關門重地一切軍需俱係鑒要  
不容減省之物撫臣計切綢繆爲未雨之防且  
開列款項爲有據之請臣等獨無同心哉但索  
之臣部者稱係崇禎二年虜入內地餉道中斷  
餉司原借閩庫銀二項計一萬七千五百餘兩  
其爲舊餉所應還者一萬四千五百一十二兩  
零其爲新餉所應還者三千四百兩雖補還無  
得推諉而著落宜求明白查撫臣于五月內具

重鎮軍需無措一疏蒙

旨下部臣簡查舊案崇禎三年八月內據山海餉司  
刁化神呈爲亟請撥補糧餉以便銷筭事冊報  
從二年八月起至三年三月止永鎮軍丁附支  
山海共放過餉銀一十一萬一千五百六兩一  
錢零除收過京運併節贖還官等銀外內舊餉  
借放過山海新餉銀三萬三千九百八十九兩  
一錢一分四厘二毫四忽又借米抵餉銀一萬  
二千九十七兩五錢二分八厘共借欠銀四萬

六千八十六兩六錢四分零隨經批行舊餉司  
已查實補發明白訖此外並未報借別項軍需  
今撫臣所題臣部并無卷案當卽劄行山海永  
平兩餉司備查前項原借銀兩的係某項其年  
月銀數有何憑據已還未還有無銷案見在屢  
次行催尚未詳報夫以爾時虜踞內地危迫之  
際頭緒保無混襍借還保無重叠在撫臣所據  
者關廳通判之呈請在臣部所憑者山永餉司  
之實數耳臣部斷不敢以應還之物堅出納之



客但錢糧必實有借而後議還必實有未還而後議補恐當日軍旅倥傯大凡庫貯銀兩通融取給亦未可知使原無借還之議則軍餉軍需各有司存臣部不任代償于三年之後也容臣部移咨該撫督同餉司務查明確回報臣部酌量補還庶錢糧可獲清楚矣既經撫臣具題前來相應覆

請恭候

命下臣部移文各該衙門遵奉施行

崇禎五年八月初六日具題本月初九日奉  
聖旨知道了卽著該餉司詳查確報不得混率欽此

同兵部今奏永鎮經制疏

題爲欽遵

召諭合奏永鎮經制事專理新餉司職方清吏司案  
呈崇禎五年七月十一日奉本部送戶科抄出  
監視東協太監張國元題前事內開崇禎五年  
六月二十九日准山永巡撫楊嗣昌會稿前事  
內開崇禎五年三月十四日准戶部咨該戶兵  
兩部會題前事等因奉

聖旨定兵卽定餉若但列營伍不開則例終非盡

一還著該撫同監視悉心詳議酌妥速奏目下仍照舊餉按月給發不得藉口經制未定致滋延誤欽此欽遵合咨前去煩照新餉官兵糧餉目前本部暫照舊數解發仍希會同監視再加詳議妥確速爲開列具奏以垂永久等因准此又查前撫臣丘禾嘉題爲看詳永鎮營制等事該兵部覆稱監臣所定永鎮止於四營而撫臣更定合燕建永鎮爲十一營較爲詳覈可無更改惟兵數已定而將領尚未坐名開報等因奉

聖旨這永鎮燕建營制既稱詳覈無可更改卽著如意訓練實裨防剿其各營將領該撫會同監視詳酌速報以便彙覆欽此欽遵在卷該臣接管五月初四日又准監視臣張國元手本會同前事准戶部會催永鎮經制官兵糧餉數目會同該撫再加詳議妥確速爲開列具奏畫一等因六月十四日又准手本會稱該本監題爲徵臣暫用稽收海運漕糧等事奉

聖旨這奏報邊路設備情形具見提防知道內應

調補兵丁及措設火器處所還者該撫悉心料理  
務期在在嚴整毋致少疎仍據實具奏其督收漕  
糧著同該道司詳加稽覈以嚴積弊該部知道欽  
此欽遵等因移會到臣該臣看得永平經制自  
前撫臣丘禾嘉覆議未定以至於今兵馬錢糧  
未歸畫一戰守將何所據出納將何所稽臣心  
悚然於受事之初恭報巡閱情形卽計防兵太  
略以一萬八千爲額益深維信守僅足支撐非  
敢浮增冗濫也兵部屢疏令於額內通融道臣

王凝祚反覆千言明其不可臣方具咨報部而  
監視臣張國元又有信守不足再擬徵調之疏  
奉

旨行臣悉心料理臣蚤夜徬徨與道臣往復數四猶  
有未定頃移駐永平朝夕面談兼就監視近商  
始有成議大都官兵仍定十一營以一萬八千  
員名爲額儘見在者先撥衝邊餘下缺兵令永  
城募補此目前之急著也馬廐牛則一千九百  
七十匹頭隻廩餉銀則三十二萬三千二百一

十六兩四錢米則一十萬七千三百四十六石  
料豆則二萬八千零八石草乾銀則一萬五千  
九百五十七兩以爲一歲之嘗而大糧鹽菜不  
入經制之中另講因革之漸臣欵開四議以入  
爲首行之積欠則將大糧鹽菜之所減便爲糧  
料草乾之所增亦未嘗非額內通融也各營將  
領奉

旨會同監視詳酌卽當遵行然知人實難臣未敢擅  
容另疏職名以



請至黔鎮許成名川鎮秦翼明部議未可更番確當  
不易臣已著蔡奉之矣所有詳定經制疏後開  
列議欵另具簡明奏揭恭進

御覽等因會稿到臣謹會同巡撫山永右僉都御史  
臣楊嗣昌合詞具題伏乞

勅下戶兵二部再加覆議上

請定奪施行等因議定四欵一何以謂之經制經者  
有嘗制者有節也守兵而支鹽菜則非嘗同等  
而有異糧則非節本宜裁之但此兵有數且其

來日久未可遽裁今宜以見在爲準查其真正  
姓名年貌疤記籍貫枝葉與父某母某或存或  
故妻某子某或有或無細造一冊不厭瑣煩然  
後逐名點查果一一與冊相應仍准照舊支給  
其點查以後有逃者故者老弱患病者除名另  
補而鹽菜大糧亦與之俱除倘隱匿不報按籍  
覆查無不立見底蘊矣該道每月一清逃故老  
弱病汰之數餉司每月一報汰除鹽菜大糧之  
數目前庶免更張而久久亦漸消減似權宜之

善策也見在大糧兵止二百四十六名鹽菜兵  
共五千五百三十六名經制之內難以造入致  
滋障礙合將某營有大糧兵若干鹽菜銀若干  
另冊掛號按月附支以便積漸減除斯爲兩得  
伏候

聖裁一兵有南北主客之分官則京省邊腹惟

朝命是遵何亦有鹽菜之例而且有者自有無者自  
無卽本等廩給多者自多寡者自寡何以謂之  
經制也今空以關門爲準其爲協營支副協之

廩其爲叅管遊管支叅遊之廩而黔鎮許成名  
川鎮秦翼明部議未可更番則念其久戍之勞  
稍存鎮帥之體于廩給外量設心紅小賞易去  
鹽菜之名亦便觀聽其兩鎮所轄中管止立坐  
管都司以便山海鎮行文節制與永平道標管  
亦止用都司以便該道節制其支廩皆照都司  
又青山箭桿二管兵止一千部文以守備管都  
司事照守備支可也黔鎮有加銜衛鋒等官三  
十二人名食兵糧實兼米折鹽菜數倍而猶曉

曉不平今裁汰改正明立該鎮下旗鼓官一員  
火攻官一員督陣官二員旗牌官四員掾牘六  
名川鎮亦如之而遊手白丁去其大半與各營  
中千把總俱照關門畫一之廩原有鹽菜者卽  
盡除之不許重冒伏候

聖裁一城邊十一營內十營皆步一營爲馬然如川  
鎮三步營原有自備馬百五十匹黔鎮本營原  
有自備馬四十七匹不可裁也今少加裒益川  
鎮所轄燕界中營設八十四匹青山箭桿兩營各

三十匹黔鎮所轄建冷中營設六十匹而其餘  
各步營皆設三十匹以脩偵探之用關門例亦  
然也永鎮中營獨增其數爲一百二十匹兼聽  
監視調遣爲出口哨探之用故不與衆營同合  
標騎營千四百匹共計馬一千八百七十四匹  
步營各有牛車十輛計牛一百隻馬料草乾與  
關門例同牛較馬日減料一升草乾亦同馬兵  
月食一兩六錢其缺馬者月扣二錢貯庫買馬  
又關寧通例也伏候

聖裁一十一管分數永鎮城四管官兵五千九百建  
昌路四管官兵八千五百燕河路三管官兵三千  
六百以信地言之似有有餘不足之分而建  
路衝長奴賊出沒之區乾棟石牆最多最不易  
守故設兵獨多且凡兵之食大糧有鹽菜者皆  
派撥於此使當衝倍勞餘更不得比例亦目前  
調停之法也燕路兵少以屬川鎮漢兵二千六  
百七兵一千餘兵不便參入而臺頭副協實近  
燕河其所管精嘗之兵雖云策內四路然去諸

路較遠惟此路多孤防守以補川鎮之不足  
勢既甚便情可相安鎮城五千九百內有馬  
仍備哨探應援之用不專城守此一萬八千之  
兵臣與巡撫道將商量終存見少而在戶兵兩  
部以爲增多欲于內通融裁精臣等千筭萬筭  
無可通融所以不敢減多于一萬八千之外非  
以此數爲果足也伏候

聖裁本年七月初九日奉

聖旨該部酌議具奏欽此又該山永巡撫楊嗣昌會



題前事本年七月十一日奉

聖旨已有旨了該部知道欽此欽遵到部送司除舊  
兵經制前議已定無容更議外新兵經制相應  
合議具

奏案呈到部該臣等會同兵部署部事左侍郎楊  
一鵬等會看得永鎮夙稱腹裏已巳之變建冷  
一帶往往受敵迄今遂爲衝邊臣等前此酌議  
新餉經制共計列營十一配兵一萬五千馬騾  
一千一百五十匹頭牛九十四隻車九十四輛

約畧已定所未定者前撫丘禾嘉虛列營伍未  
定則例臣等不便懸爲厚薄而大糧鹽菜之冗  
頗啓關門垂涎者又不便徑爲裁省耳今該撫  
楊嗣昌酌量裒益與臣等所見大同小異其同  
者汰定川黔之冗員漸減防援之壘廩將來節  
省實多其異者營仍十一而增兵三千增馬牛  
六百二十餘匹隻視額內通融之

明旨未免稍浮然而該鎮營制原屬未定不妨量爲  
請益各鎮久有確議者自不得援例妄加且

萬八千該撫尚存乎見少而臣等又何敢硜硜  
節約掣綢繆者之肘也該撫疏稱知人實難各  
管將領除川黔二鎮仍照部議外餘俟另疏具  
請則該撫其慎之長慮也今就其所條上四議反覆  
看詳如守兵而支鹽菜同等而有異糧裁之誠  
是獨念口中之食奪取不易應如該撫議造冊  
查核逃故老弱患病者除名另補止照關門食  
糧更不重支鹽菜而見在大糧鹽菜其不入經  
制另冊掛支以便汰減倘該道清之有法持之

可久真可漸火銷除者與又如均之將領而  
某橫分有無廩給亦間有多寡委非制之平也  
應如該撫議協督支則協之廩叅遊支叅遊之  
廩一以關門爲準惟餘鎮許成名川鎮秦翼明  
遠戍日久于廩給外量加心紅小賞而去其塩  
菜名旣正而實不甚浮其兩鎮中營永平道標  
管止用都司官廩而青山箭桿二營雖以守備  
管都司事然兵止千名仍應以守備開支川黔  
兩鎮兵少官衆每鎮下明立旗鼓一員火攻一

員督陣二員旗牌四員掾牘六名俱照關門畫  
一之廩原有塩菜者槩除之兩鎮當無不廉約  
相申飭矣該鎮十營皆步一營爲馬然哨探爲  
三軍之耳目步營亦不可無馬查驃騎營設馬  
千四百匹專備策應衝鋒之選而各營豈無緩  
急所宜備馳驅者應如該撫議除川鎮三步營  
自備馬百五十匹黔鎮本營自備馬四十七匹  
外川鎮所轄燕界中營設八十匹青山箭桿兩  
營各設三十匹黔鎮所轄建冷中營設六十匹

而其餘步營各設三十匹以備偵探惟永鎮中  
營獨增至一百二十四匹爲出口哨探之用兼備  
監視調遣十步營共車牛一百隻馬料草乾與  
關門同牛較馬日減一升草乾亦如之但缺馬  
兵丁月扣二錢固是關寧通例然或指有馬倒  
損後而言若虛設之馬恐又未便作額以索無  
馬之乾矣一十一營多寡視乎衝緩派撥因乎  
遠近該撫議建昌四路衝長且多乾挿石牆最  
不易守不得不多爲設備又大糧塩菜之兵卒

處於此使之倍勞而享厚餼他營自無敢怨望者燕河隣近臺頭卽以臺頭副協所管精銳瓜防燕路以補川鎮之不足計鎮城四營官兵五千九百建昌四營官兵八千五百燕河三營官兵三千六百而鎮城有馬者仍備哨探接應不專城守則該鎮步騎相叅布置亦已密戰守互用調援亦不乏矣通計該鎮額兵一萬八千名馬一千八百七十四匹車牛一百隻除見在大糧兵二百四十六名鹽菜兵五千五百三十六名

每月另冊核支漸次銷除有減無補不必入經  
制外歲用官兵廩餉銀三十二萬三千二百一  
十六兩四錢本色米一十萬七千三百四十六  
石馬牛草料乾銀一萬五千九百五十七兩料  
豆二萬八千零八石馬兵倒損者月扣二錢貯  
庫買馬其增設未募之兵虛議未市之馬仍俟  
入伍入廐日遠其每月餉司止照該道實在兵  
馬號冊支放總之臣等不敢以節省疎邊備而  
該鎮亦勿以圖兵盡驥取盈虛糜將飽騰奏效



而岩疆克鞏矣總計今次經制較前次經制歲  
增官兵廩餉銀四萬七千七百九十九兩六錢  
馬匹草乾銀五千四百五十一兩三錢本色米  
五萬三千二百九十四石本色豆九千三百三  
十一石二斗綠前未定而今初定臣等不得不  
爲曲從至于鹽菜大糧議減則猶姑俟之異日  
也若夫舊兵歲支舊餉銀二十九萬七千七百  
七十兩五錢六分三釐四毫米五萬八千四百  
三石八斗五升五合豆九千四百三十八石四

斗草一十一萬八千九百八十束前議已確無  
容增減又在新兵新餉經制之外矣既經會議  
僉同相應合

奏恭候

命下臣部移文各該衙門遵奉施行

計開

永平鎮

新餉

永鎮中協營

總兵中軍千把等官八員

兵丁一千四百九十二名

馬騾牛一百三十三頭隻

歲該支廩餉銀二萬七千零二十

七兩六錢米八千九百五十二

石草乾銀一千零五十三兩料

豆一千八百三十六石

永鎮左營

遊擊中軍千把等官七員

兵丁六千四百九十三名

馬騾牛四十匹頭隻

歲該支廩餉銀二萬六千四百六十八兩四錢米八千九百五十八石草乾銀三百二十四兩料豆五百四十石

永鎮右營

遊擊中軍千把等官七員

兵丁一千四百九十三名

馬騾牛四十匹頭隻

歲該支廩餉銀二萬六千四百六十八兩四錢米八千九百五十八石草乾銀三百二十四兩料豆五百四十石

永鎮標騎營

都司中軍千把等官十員

兵丁一千三百九十名

馬騾一千四百匹頭

歲該廩餉銀二萬七千九百九十九兩六錢米八千三百四十石  
草乾銀一萬一千三百四十兩  
料豆二萬零一百六十石

駐防建昌路黔鎮總兵官標下建冷中

協營

總兵旗鼓坐營中軍千把等官二十

員

掾贍兵丁二千九百八十名

馬騾牛七十匹頭隻

歲該廩餉銀五萬三千八百零九  
兩二錢米一萬七千八百四十  
四石草乾銀五百六十七兩料  
豆九百七十二石

白石營

叅將中軍千把等官八員  
兵丁一千九百九十二名  
馬騾牛四十匹頭隻

歲該廩餉銀三萬五千一百七十五兩六錢米一萬一千九百五十二石草乾銀三百二十四兩料豆五百四十石

河徐營

叅將中軍千把等官八員

兵丁一千九百九十二名

馬騾牛四十匹頭隻

歲該廩餉銀三萬五千一百七十



五兩六錢米一萬一千九百五  
十二石草乾銀三百二十四兩  
料豆五百四十石

桃林營

遊擊中軍千把等官六員

兵丁一千四百九十四名

馬騾牛曰十匹頭隻

歲該廩餉銀二萬六千四百一十

三兩二錢米八千九百六十四

石草乾銀三百二十四兩料豆

五百四十石

駐防燕河路川鎮總兵官標下燕界中

協管

總兵旗鼓坐營都司中軍千把等官

一十五員

掾牘兵丁一千五百八十五名

馬騾牛九十匹頭隻

歲該廩餉銀二萬九千五百五十

七兩二錢米九千四百七十四  
石草乾銀七百二十九兩料豆  
一千二百六十石

青山營

守備千把等官四員

兵丁九百九十六名

馬騾牛四十匹頭隻

歲該廩餉銀一萬七千五百六十

兩八錢米五千九百七十六石

草乾銀三百二十四兩料豆五

百四十石

節算管

守備千把等官四員

兵丁九百九十六名

馬騾牛四十匹頭隻

歲該廩餉銀一萬七千五百六十

兩八錢米五千九百七十六石

草乾銀三百二十四兩料豆五

百四十石

以上通共歲該廩餉銀三十二萬三千二百一十六兩四錢米一十萬七千三百四十六石草乾銀一萬五千九百五十七兩料豆二萬八千零八石

崇禎五年九月二十八日具

題十月初三日奉

聖旨永鎮兵馬錢糧既經酌定併開報減補事繕俱

依議行欽此

覆澳夷支銷錢糧疏

題爲澳夷聽唆要挾冒領數萬金錢乞

勅銷笑以充正餉事專理新餉山東清吏司案呈崇  
禎五年七月初十日奉本部送戶科抄出廣東  
巡按御史梁天奇題前事因奏澳夷冒餉一案  
內開該臣會同兩廣總督今丁憂王業浩看得  
澳夷原領安家月糧衣甲等銀五萬二千三百  
零八兩皆通判祝守禮齎至澳中面給取諸夷  
領狀繳報甚明各夷自起行以至回澳自行追

以至今日皆未有分毫短少之言卽今之送還  
五千兩也餘只乞憐減免亦無別項借冒之語  
則前銀實歸澳夷不待言之畢矣該部仰遵何  
難盡蠲之

旨業已停追以昭

皇上柔遠之仁至于譏防貿易嚴禁接濟等項臣等  
已行海道力行飭禁無庸再議所據司道造報  
原給週澳夷各項銀數如有用贗造冊繳奏伏  
乞



勅下戶兵二部查覈施行等因本年七月初八日奉  
聖旨該部覈議具奏欽此欽遵抄出到部又准兵部  
咨同前事內稱澳夷餉銀事隸戶部應否停追  
應聽戶部酌覆等因咨會到部并送到司相應  
議覆案呈到部該臣等看得澳夷原領行月安  
家衣甲共銀五萬二千三百餘兩除應得開銷  
外應追還官者尚該銀三萬四千三百有奇前  
因奉有量行減免以示優恤之

旨該按臣梁天奇議減三分之一尚應追銀二萬二

千八百七十一兩具題于崇禎五年正月初八日奉有

明旨這發過銀兩如果實歸夷人念其鄉義何難盡蠲但冊內不開項數初間顯有借冒以後保無陵撥還著該督校嚴查詳究據實奏奪欽此是

皇上之復令嚴查者正恐未必盡入夷人之手不無借冒之弊耳今據督按王業浩梁天奇查奏疏稱前項銀兩皆係通判祝守禧齋至澳中親給見有諸夷領狀及本官底卷歷歷可稽臣部據

冊詳數數復相符其實歸夷人並無借冒也明  
矣今已追還五千兩餘只乞憐求免向使別有  
假冒犬羊之類豈甘屈首無言該道仰體

皇上業已停追示恤督按加意柔遠又復合辭請蠲  
所當准其開銷以昭

浩蕩之殊恩也既經查明回

奏并冊報前來相應覆

請恭候

命下臣部移咨該督按衙門遵照施行

崇禎五年八月初五日具

題本月初九日奉

聖旨據督按官奏銀兩果實給夷人依議除已追外  
餘准免追以示朝廷柔遠之仁欽此

覆中協千兵修築塩菜疏

題爲舊垣淋圯數多勉責王兵修築懇

恩准給工犒以卹疲勞事新舊二餉司案呈崇禎五  
年七月二十八日奉本部送戶科抄出監視中  
協太監主之心題前事內稱看得從來邊工俱  
係班軍修築今歲因班軍到遲旣主兵辦料矣  
又因山東班軍留防復責主兵修築舊工矣見  
今尚未告竣一旦復責以新圯之工撫臣非不  
知疲力不堪再用第今秋防空嚴則各處倒塌

之牆垣不得不亟爲整理至于請照近例准給  
鹽菜亦屬撫臣鼓舞苦心非好爲惠施也等因  
七月二十七日奉

聖旨該部酌議具覆欽此又該順天巡撫傅宗龍會  
題前事七月二十九日奉

聖旨已有旨了該部知道欽此欽遵抄出到部通送  
到司案查本年二月內該本部題爲遵

旨奏明邊牆急工事議覆酌永監視題

請借王兵赴工者姑減行米而給鹽菜但查工犒餉

用舊餉而崇禎三年大修則所用舊餉少而新  
餉多合無于新舊兩餉內均平給發以明共濟  
而客歲所存所發工犒銀兩仍行督撫查明果  
有贏餘俱作舊餉之數等因二月十八日奉  
聖旨依議卽著查明軍兵實數預措速給毋悞急需  
欽此遵行在卷今該監視等題

請到部擬合照例具覆案呈到部該臣等看得中協  
邊牆舊工甫竣新圮復多當此秋防戒嚴不得  
以主兵重困少緩畚鍤之圖矣然鼓舞振作使

其勞而不怨則鹽菜一節尤當喫緊臣部於本年二月間因班兵到邊主兵代爲辦料題

請每日加給鹽菜銀二分以恤其私業奉

欽依在案今松棚等路邊工疊興監撫諸臣援例以請則照舊給發自不容吝惜使借口以悞版築者但赴工一日則給一日之鹽菜而歇工及空閑之日要不得一槩混領者也旣經監撫會題前來相應具覆伏乞

勅下臣部移咨各該衙門并行令餉司查明赴工主



兵數目一體照例給發施行

崇禎五年八月十一日具

題本月十五日奉

聖旨塩菜銀准給發但須工皆堅整銀無虛糜著該  
管官嚴行查覈欽此

覆津撫議造運舡疏

題爲運糧一百五十萬石爲數不少運船四百九十七隻缺額過多叩乞

聖明亟

勅補造無悞急需事專理新餉山東清吏司案呈崇禎五年六月初一日奉本部送戶科抄出天津部院鄭宗周題前事內開津門海運創自萬曆四十七年前部院李長庚

請發錢糧造船八百餘隻又前部院黃運泰添造買

補船九十餘隻總計官船九百五十七隻內除  
節年失風三百九十四隻今撥登抽撥六十六  
隻實存官船四百九十七隻較之原額已缺一  
半若不亟議新造恐無以濟急需目下全求補  
額臣不敢爲此時誦之舉但權宜造用二百隻  
萬萬不可少之數萬萬不得已之役也叩乞

皇上軫念海運非輕察臣控籲最切

勅下戶兵二部速覆照船定價措發錢糧開造每隻  
可裝千石者以二百四十兩爲率仍以貯司照

造銀八千七百八十餘兩充奏務造二百隻之  
數津淮分造竝舉成功如是而運事無誤關寧  
固而天下安所係非淺渺也等因本年五月二  
十八日奉

聖旨關寧津運向無遲誤何至今日以船隻多缺爲  
辭該部覈議具奏欽此又該督餉御史王邦柱會  
題前事六月初三日奉

聖旨已有旨了該部知道欽此欽遵抄出到部送司  
案查津運伊始船隻造之淮上其船價動支工

部無關之

皇木關稅以及各關之木稅解淮督造又前部院黃  
運泰添造船九十餘隻未知費價若干動用何  
項須查議詳妥方便題覆等因說堂咨行津鄆  
查議去後今准回咨內稱議造而動支關稅定  
需歲月勢不能止竭于望梅惟前黃部院曾得  
請銀二萬五千兩隨于水腳銀內陸續扣還是  
今日造船之銀卽作後日水腳之銀成例具在  
請發新餉銀四萬八千兩便可造船二百隻不

費公儲一毫而輓輸不悞此一議也不然則津  
儲朋造銀四萬三千四百六十八兩六錢有零  
原係歷年船戶朋積以備修葺之用者也近因  
內部欠二三四五年添價銀七萬一千有奇樊王  
事遂借朋銀給之除兌塩課散給外尚欠四萬  
八千一百七十六兩九分此內有朋銀二萬零  
二百三十七兩五錢七釐未還今添價銀之當  
發固其時而朋造銀之應補亦其日矣若併將  
所欠津門添價四萬八千一百七十六兩九分

有零慨賜給發以爲造船之用亦屬便計或者以添價一時難措不知此內原有借過朋造銀二萬二百三十七兩五錢零應與補還若以船戶備造之朋銀不還爲船戶用以船戶應得之添價不發爲船戶資併以船戶可扣之水腳不先借給以爲海運備恐關鮮必不可以無糧溟渤必不可以飛渡安危所係利害較然又豈待再計而決哉此又一議也等因到部送司相應議覆案呈到部該臣等看得關寧朝鮮薊永各

鎮百餘萬軍精航海而運是舟楫之力誠鉅而  
剡造之務誠急也查海運始於萬曆四十七年  
一時造船數百隻併動工稅併從淮造蓋援漕  
船之例也迨臣待臯津門創設朋造之例而淮  
上六役有造船之役矣至今猶存淮幫津幫之  
名加以濱海之民舟耕水耨攬載卽其生涯有  
水腳之利以招之群冒險而不辭故官船雖少  
不足爲海運梗每歲三運拮据大抵僱覓居多  
而官造者少矣無奈前項官船年來風波衝激



缺損益多又今歲援萊借充兵船者六十六隻  
俱爲盜資兼登州之變民船回棹僅覓甚難而  
朋造銀前因臣部添價無措津門未免那借爲  
用此津部所以有請銀浩船之議也故議船價  
津門不得不問朋造議朋造臣部不得不還添  
價計臣部積欠津門添價共四萬八千餘兩此  
內借過朋造二萬二百餘兩若欲盡還添價臣  
部一時難措卽該撫亦已洞晰矣而朋造之銀  
在今日給船戶爲備造之物在後日又扣水脚

爲取償之資則臣部之不敢推辭者也據津部  
議定每船裝千石爲準價以二百四十兩爲率  
津庫見貯銀八千七百餘兩合無先造船百隻  
臣部補還添價銀一萬六千兩以抵朋造再動  
津庫八千兩共足二萬四千之數責成餉道督  
委殷實船戶如法剋造其用過銀兩作爲底載  
仍照例於水脚內分八運扣除向後積有朋銀  
再議補造自可不費官帑而坐收航海飛輓之  
效矣但造船之弊亦甚多端船戶領銀入手率

多侵尅或買舊船充數或以不堪搪抵相沿成  
習各處販船販板至津門者既鮮堅厚亦無美  
材走海之險不耐風波不惟物力可惜且併其  
裝載之軍糧而失之今宜先立一法將新造船  
隻另編新幫造完冊報臣部每三運完日餉道  
呈報前項船隻有無損壞間有壞者速行朋造  
其損壞過多者卽係成造不堪追賠究擬則領  
造者一思其終自慎其始必不敢以夙習嘗試  
矣旣經移咨酌議前來相應覆

請恭候

命下臣部移文津部及司道遵奉施行

崇禎五年八月十三日具

題本月十六日奉

聖旨這補造船隻事宜依議仍著該撫設法稽查嚴  
核弊蠹務求堅整可久有虛糜搪塞的定懲究追  
陪嚴飭行欽此

題議津運島粮疏

題爲預計額運以足島糧事專理新餉山東清吏  
司案呈崇禎五年八月初十日奉本部送據東  
江總兵黃龍呈前事內稱海外屯兵以來各島  
米糧節年取足於登津二運蓋津運之截漕原  
以補登運之不足崇禎二年以前固無足憑自  
崇禎三年島兵定以二萬八千則津登二運各  
額以八萬有零崇禎四年島兵定以二萬則津  
登二運各額以六萬有零蓋因兵之增損而糧

之裒益因之也今年兵數因亂而減職先已具  
文報部實計各島兵丁一萬五千三百有零茲  
以向議減兵減餉故不泥原數而取盈也顧計  
兵程米則本年該島糧共九萬二千有零而登  
事未寧毋論海口阻塞卽民力有所不贍今津  
之運到者僅三萬耳倘津依上年額數仍運以  
六萬爲止則島糧尚少三分之一者將於何處  
告盈乎及此時而不預計額運足數歸併天津  
則秋深海結登萊無可運天津不及運島兵舍

哺於夏秋未免啼饑於春冬伏乞查照應給島糧額數總於天津截漕內速賜題發等因到部奉批津糧有限東江欲併登運而索之其何以支然不可不蚤爲酌議也新餉司速核具題本月十一日續准兵部咨亦據黃龍呈前事移咨到部俱送到司奉此相應酌議具題案呈到部該臣等看得津運島糧原有成數臣部先經三四籌畫而未敢多發者非吝也蓋斟酌於與金與庾之中恐有賁盜之虞耳迨總鎮黃龍移文

屢請島情漸通臣部亦信接濟之宜亟查本年  
原定津運島糧六萬五千八百八十石先經陸續  
發運三萬石又關外代運三千石督臣發過一  
千七百石又有去年

奏繳疏內預運島糧六千石新經臣部題

請起運二萬石前後已足米六萬七千石僅存米五  
千二百八十石耳近又題

請津門買運布花各一萬意島兵可無啼號之患矣  
乃該鎮尚慮秋深海結欲爲冬春含哺之計又



因登運艱阻而爲歸併津運之圖似前發猶存  
乎見少者夫津門預計之外更無餘米島中有  
限之兵何庸多糈夫每兵每月五斗者例也其  
實每兵日食不過一升卽以萬五千計之月食  
米五千石止矣卽以一歲計之亦須米六萬石  
足矣前此春月雖間有壓欠而事成已往自夏  
月以來已解到米三萬四千七百石豈一朝頓  
盡矧題發未到者又二萬石也無已臣部再以  
津運未發之五千二百八石益之以完五年之

額此外再照去年之例預運米六千石作六年  
津運之數則冬春之儲取之此而有餘俟明年  
水泮後接濟未晚也查島兵之在旅順者僅七  
八千人其餘散處各島者率皆自食其力似亦  
不必取盈於登運之數矣况折色餉銀又經移  
文東撫自爲供億乎該鎮倘念津運數萬皆竭  
筋力以辦之復冒不測以運之萬里梯航粒粒  
非易而倚劔盤食者益當鼓勵於鼓腹之餘矣  
伏乞

勅下臣部速行津撫將原派今歲島糧除前後發運  
外其餘并預運速行照數運發施行

崇禎五年八月十四日具

題本月十六日奉

聖旨依議仍著該撫傳飭該鎮按兵計食裒益樽留  
以備緩急不得一任糜冒但請轉輸欽此

覆閩省貼駕并撫按軍餉解部疏

題爲報明給過撤回援兵錢糧事專理新餉山東  
清吏司案呈崇禎五年七月二十九日奉本部  
送戶科抄出福建巡撫熊文燦題前事內開撤  
回援兵應給行糧動過天啓七年祿派銀六千  
五百六十六兩五錢七分四釐准其開銷至臣  
先解過月糧銀一萬兩到部未給援兵亦當聽  
該部撥補閩省正項等因本年七月二十七日  
奉

聖旨戶部知道欽此又該該撫熊文燦題爲汛兵貼  
駕欠已遵

旨飭行事內稱崇禎二三年分見在貯庫貼駕銀一  
萬兩目當行濟臣遵

旨解進以佐軍需惟此後年分聖

聖恩垂念海邦在

廟堂視之如毫毛在閩海得之實命脉懇免再解以  
存防倭遺意仍聽閩省後來撫臣逐年親查將  
實在所積銀數每于年終報部稽考庶免侵漁

之弊而貽無窮之福矣等因本年七月二十八日奉

聖旨解進銀兩著照數查收仍酌議具奏該部知道欽此欽遵抄出到部送司案查崇禎四年七月該閩撫熊文燦奏爲欽奉

聖諭事內開閩省官兵征軍共二萬九千二百三十六員名除延平上杭額兵一千七十一名另支本等工食不動餉銀外每年用餉銀二十七萬七千一百五十九兩七錢零通省額餉共銀三

十四萬九千一百有奇而各屬拖欠年徵實未  
滿三十萬也逐年除給散前項官軍月餉外尚  
有造船置器買硝修城工資賞賚一切禱費共  
用二萬七千二百二十餘兩皆取給於此餉之  
內又閏年官吏師生廩俸一萬七千六百九十  
餘兩各役官兵工食二萬三千餘兩亦加支于  
此餉之內藩臣主出納臣主清查自臣受事以  
來將臣標下團隨員役裁去銀八百兩及鎮道  
將中軍裁去銀七百八十兩俱逐年解部者又

臣于任內設法節省解過餉銀二萬兩以充遼  
餉又臣選入衛赴援見在官兵一千五百名每  
年大約應解月餉一萬七千餘兩及臣曾題留  
貼駕征軍銀今且有一萬餘兩貯庫乃年積之  
而不竭者皆是此額餉之數以上或裁汰或抽  
出那湊以資邊急變通以合時宜等因四年七  
月初七日奉

旨下兵部移咨到部該本部議將存貯貼駕銀一萬  
餘兩并援兵撤回遺餉一萬七千餘兩抵作四



年分該省巡撫軍餉三萬三千派內之數其餘  
另指補足等因覆奉

聖旨閩省方在用兵尚有贏餉解部熊文燦具徵廉  
幹這貼駕征軍銀一萬餘兩依議每年解充新餉  
至援兵旣已撤歸月餉仍行解進該省復將何項  
膳兵計部軍糈固股外藩保障亦重著再行酌議  
確奏欽此該本部復行議覆于四年九月十七日  
奉

聖旨這福建撤回援兵月餉銀一萬七千兩著留本

省支用其軍餉銀還著足數解部本內兩贍字訛  
贍改正行欽此欽遵通行在案至四年十月本部  
題爲遵

旨酌減撫按助餉原額以期可行事議將福建巡撫  
原派軍餉三萬三千兩減定二萬兩巡按原派  
公費四千兩減定三千兩歲爲常額題奉

欽依通行在案今該撫具題前因再查崇禎四年十  
一月內福建差官郭君聘解援兵月糧銀一萬  
兩本司因援兵撤回未領將前銀呈堂撥抵該

省襍項未完內抵元年分未完銀六百七十五兩一錢抵三年分未完銀八百一兩二錢抵四年分未完銀八百一十八兩五分三釐尚餘銀七千七百五兩六錢四分七釐算作五年分襍項銀訖業經移文該撫併藩司知會在案其該撫軍餉除四年解有二萬兩原筭三年之數外餘無續解巡按公費四年欠一千兩五年全欠相應併議具覆案呈到部該臣等看得閩省貼駕銀兩先是臣部覆

准解充新餉之用亦卽該撫軍餉之數原未嘗竭澤而漁也今該撫疏稱見貯一萬兩遵

旨解進以後年分懇免再解以存防倭遺意其爲海邦綢繆之慮誠遠矣第該撫軍餉從三萬三千而減爲二萬久已算入額中此毫不可缺亦時不容緩者也四年所解之二萬原作三年之數而四五兩年之應解者計尚該四萬兩查該省額餉三十四萬有奇而歲需者僅二十七萬此外造船置器等項襍費二萬七千餘兩其餘皆

待閩之需若無閩之年約可剩餘數萬前撫旣  
能搜剔于前後撫何難攸行于後祇緣該撫當  
陞任之餘爲去後之計欲嘗留有餘不盡之財  
力於八閩故爲此惓惓耳如使貼駕一項借防  
倭而留則該撫軍餉又借貼駕而減矣且貼駕  
之解旣抵該撫軍餉之數該撫軍餉之餘亦可  
爲地方飭備之用又何必與臣部爭執乎似宜  
仍令按年解進以遵

前旨者也至于援兵回省行糧銀六千五百六十餘

兩動支七年禱項以題留該省之故物給授兵  
應得之行糧自當准其開銷其解部未支月糧  
銀一萬兩已經臣部銷算於該省未完雜項之  
內不爲無抵卽撥之該撫撥補正項之議亦無  
異同姑俟起解貯庫貼寫銀一萬兩到部算作  
四年二萬之額其所欠一萬及五年應解二萬  
併巡按公費兩年共欠四千兩俱聽併行速解  
以濟薪遼之急可也既經該撫具題前來相應  
覆

請恭候

命下臣部移咨該省撫按遵奉施行

崇禎五年八月十七日具

題本月二十日奉

聖旨這貼駕銀兩併四五兩年欠額巡按公費俱著  
速解充餉援兵行糧銀准開銷欽此

覆中州鄉紳條議撫輯留餉疏

題爲中州賊勢披猖撲滅急須早計懇乞

皇上立決廟筭責成撫按速奏蕩平無俾蔓延事專  
理新餉山東清吏司案呈崇禎五年八月十四  
日奉本部送戶科抄出戶部等衙門右侍郎等  
官周士樸等奏前事條議中州弭賊綏民留餉  
等事竝緣繇本年八月十二日奉

聖旨中州亂賊亟宜剪除奏內諸款關切兵計該部  
看議速覆欽此欽遵抄出到部本月十四日又准



兵部咨同前事內開除事例本部者本部議覆  
外如一被災之民一將士從戎一席安日久三  
款皆事關計部相應咨會煩照

明旨內事理將咨會三款速行議覆等因移會到部  
奉批新餉司查議速覆俱送到司相應列款議  
覆案呈到部該臣等看得賊盜竊發處處見告  
而天中爲宇內腹心不堪動搖乃葉縣之變忽  
然而起僭竊悖逆攻城掠邑乘其無備而肆志  
馬狂焰遂不可嚮邇也然鳥搏獸蹙有獫狁之

形無不板之勢第恐天災人窮號召者衆羽翼  
一成則始發不制卒成莫解之禍如秦晉齊魯  
之前車可鑒也臣同官周士樸等諄切桑梓共  
矢訐謨以速之一事爲前矛以法之一字爲中  
堅得先着矣已從賊者散其黨未從賊者堅其  
心得要著矣中間事關兵機者臣部不敢佐中  
樞之妙算而反側觀望之餘倍費輯寧師旅張  
皇之際須得宿飽臣部敢從其後而畫一籌謹  
就原題內事隸臣部者三款逐一覆

度支奏議

請伏乞

勅下臣部轉行該省撫按遵奉施行

計開

一被災之民窮而無告無論本地流來所  
在有司皆當發倉煮粥給以銀錢予  
有生活之路則不肖之心自可潛消  
事完造冊報部分別勸懲

前件饑民流離生歿莫必其命順逆正  
亂于裏收之則民棄之則賊矣司民

命者宜多方軫恤擇其貧不堪自活者分等賑濟或發倉廩或勸賑助或食之粥糜或給之錢米精神到處照管勿遺枵腹而飽貪腹勿借饑民而擾富民則更生可望自潛消其走死如驚之心而煽動靡術亦無難爲剪滅朝食之地該撫按當以此爲有司功罪俾覲勸于善政者也

一將士從戎性命所不顧也亦當與以宿

飽至于一切行糧製器犒賞等費皆  
不可少此時責之以別爲搜括必至  
坐誤卽于所在州縣量動新餉襍項  
銀兩事完報部查覈開銷但不得濫  
冒以取罪責

前件中州久安之地一旦稱兵一切軍  
糈必無備也乃該省不聞呼之臣部  
者或謂糧之無多供應非繁該省權宜  
搜括用之無須留餉耳然事體一日

未定省費一日未卜故地方人爲地  
方計欲以地方物力而濟地方急着  
旣迫責其辦賊不得不多與之辦賊  
留餉實不容已然地方之情臣部不  
能逆料留餉之數臣部亦不能懸定  
大抵以江右之事較之鹽徒之橫逆  
不甚于海寇之猖獗中州之留餉視  
江右三萬之數當寧儉無奢矣應于  
五年未解正禱新餉聽其酌量留用

事完造冊報部銷筭但求實用而勿  
虛糜則大幸矣

一席安日久士紳終歲所蓄所需多積之  
鄉莊以待不時取用今盜賊所過搶  
焚如此其慘何如先爲清野之計盡  
運於城以絕賊之垂涎且可以備城  
守緩急之需而一方守令尤當節省  
捐括儲粟以樹軌則一切罪罰皆收  
本色必不可改折銀兩仰以逢迎上

官儻以充潤囊橐也

前件太平野被之象卽巨室富戶菽粟  
多蓄別業城中皆輕便而寡積聚賊  
盜一過焚掠可惜城守戒嚴又空虛  
可慮也守令宜下令國中俾其搬運  
入城以免資盜以實城守卽人自爲  
計當亦樂從恐後矣至鄉居之民又  
不得以此相苦也地方各官仍廣求  
積貯之方以節搜者予官而尊又爲



卑勸以輸助者予民而官又爲民勸  
一切贖罪除解部外皆收本色其被  
兵之處贖罪可已也其震鄰之處折  
色可已也有事之日共倚保障芻牧  
是求各切身名撫按執法臨之一洗  
膏潤之陋可矣

崇禎五年八月十七日具

題本月二十日奉

聖旨朝廷任用撫按及道府有司專爲輯寧地方備

禦緩急豈待中朝每事申飭河南地屢諭修備甚  
明本內賑濟積貯等事卽著守土各官隨左料理  
設法力行其五年新餉依議量留仍報部查筭不  
許糜冒欽此

題報三河境內強賊劫餉疏

題爲強賊截劫餉銀事竊理新餉山東清吏司案  
呈崇禎五年八月十五日奉本部送據永平鎮  
領餉委官杜希韓稟報領到七月分新餉銀一  
萬四千九百三十六兩五錢三分于八月初十  
日出京十二日行至三河縣地方東十八里段  
家嶺西被馬上強賊數十人各帶弓箭器械截  
住希韓率領護送快役奮力抵擋不住被賊將  
希韓射傷頭皮拔箭可驗截去銀五鞘共銀一

百錠合銀五千零二兩隨時具呈三河縣本縣  
將銀數查明卽差番快四路捉拏外希韓將下  
剩銀兩押運赴鎮交完另行回報等情具稟報  
部奉批餉銀被劫數至五千餘兩漸豈可長本  
部每次發餉俱給有撥兵護送牌據稟不顯原  
送兵快若干人此何說也新餉司作速具題本  
月十六日又據三河縣知縣劉夢煒呈同前事  
內開據永平鎮委官杜希韓呈稱奉永平戶部  
差領到在京新庫七月分餉銀一萬四千九百

三十六兩五錢三分計一十五鞘本月十二日  
行至三河縣段家嶺迤西地方被強賊數十名  
各執弓箭腰刀策馬截住韓等奮力協同巡路  
快役抵擋不住被賊將韓射傷頭皮穿帽拔箭  
可驗劫去銀五鞘每鞘銀二十大錠共銀一百  
大錠共計銀五千零二兩等情呈報到縣據此  
該本縣知縣劉夢煒隨即多差兵快嚴督巡捕  
員役緝拏外事干大盜劫餉卑縣未敢擅便擬  
合申報等因到部奉批新餉司速題奉此相應

具題賠緝案呈到部該臣等看得餉銀何等關  
切臣部每次發餉卽移咨兵部請發勘合車輛  
斤撥兵護送又牌給本官知會經過州縣軍衛  
驛遞等衙門如遇銀鞘到彼卽便多撥兵快護  
送逐程交卸庶保無虞如有疎玩從重叅處所  
過地方有典守之責者宜何如恭飭令永平委  
官杜希韓行至三河縣地方被盜劫去餉銀五  
千零二兩始無論該縣平日無備而臨期諄諄  
牌諭豈置若罔聞不將多撥快役護送耶夫此

五千餘金百萬姓膏血亦三軍命脉也臣部奏  
發倍萬艱難虎兇出匣是誰之過所當責令該  
縣印捕衙所等官照例先行賠補仍勒限獲賊  
自贖不得爲該縣寬假者也然近日盜賊縱橫  
百十成羣或係地方之亡命或係營伍之逃卒  
壯快民兵勢皆單弱卽日修防護之虛文不過  
徼倖於無事一遇盜劫無不呴走一年之內攘  
臂官鎗者纍纍見告長此安窮以後凡解發新  
餉不得拘沿途州縣之說當令一鎮撥兵護送

至一鎮交割卽遇州縣添民快從行而鎮兵不得卸擔也或以各鎮護送爲繁行令各鎮餉銀卽各鎮發健丁迎護臣部發銀預與期會不使兵丁久候請

勅督撫從長計議務保萬全仍

勅司捕司兵各經管諸臣潰輯防訓練之有方尤所以杜絕盜源而不至嗟失事之何及也恭候命下臣部行文順天撫按衙門遵奉施行

崇禎五年八月十七日具



題本月二十一日奉

聖旨解餉沿途防護屢旨嚴飭如何仍然踈玩致被  
橫劫劉夢煒及縣衛巡捕各官著查明議處仍著  
該撫按一面勒限責陪戴罪緝獲奏奪飭備弭盜  
自是地方官專責不得更議鎮兵迎護以滋紛擾  
諉卸欽此

會同刑部覆葉有光等侵損糧料疏

題爲奸蠹作弊最深餉務耗費可駭謹據實

上陳乞

勅撫臣嚴追寃罪事戶部新餉司刑部雲南司案呈  
崇禎五年五月二十五日戶部題前事內開永  
鎮奸委葉有光等或以白丁而貪克委任或以  
卑官而管管蠹吏其謀心以米豆爲奇貨以泔  
爛爲騙局也故若欠若侵若爛米豆共計三千  
七百一十九石三斗零倘非監視督撫諸臣查

出糾叅將繼此以往又不知侵爛凡幾矣今自  
奉

旨追完而葉有光等之走死地如驚者翻然觀三尺  
而知懼各將侵者吐爛者賠爭先完納以希末  
減府道援例以定罪督撫監視依擬而入

告內擬永成者三名葉有光夏鼎婁榮是也分別贖  
配者五名王璠金調鶴金世任胡時和沈家駒  
是也納米贖杖二員名張織楊一頑是也既經  
確審會題相應

下該衙門分別發落內同知張織以失于查報原  
擬杖贖今督撫監視諸臣疏稱本官察奸雖遲  
原無點染且開河漕爲輓運計能垂永遠之利  
欲徼使過之仁此則

鴻恩出自

聖裁臣等未敢擅擬者也本年五月二十五日具題  
本月二十八日奉

聖旨葉有光等侵損糧料按律追贓併張織情罪宜  
有定評還著同刑部確擬來看欽此欽遵隨該戶

部移咨刑部確擬會覆該刑部看議得葉有光  
婁榮夏鼎等以軍需爲奇貨假出納而侵牟計  
贓辟遣罪應如律但完糧限內姑從例減胡時  
和沈家駒等不行晒晾以致虧折金世任督運  
稽遲計贖追糧此數人者分別贖配足懲其怠  
楊一禎欠糧獨少完糧最先減杖非縱至如同  
知張織職司糧務乃各委侵漁弊端種種而竟  
不之察何其疎也但無所侵染且前有開濬之  
功後有追補之舉量從失覺察之條贖杖還職

是亦使過之仁等因回咨戶部相應會議合

奏案呈到部該臣等會同刑部尚書臣胡應台等  
會看得法懸諸律擬當厥辜無得而私輕重也  
顧有律中之法亦有法中之仁按律追贓計贓  
論罪者法也完贓末減功過相準者法中之仁  
也永鎮商委葉有光等壞法作奸侵損米豆照  
其贓數多寡坐以應得罪名寧敢少貸惟是完  
贓限內例當減等而失察無染之張織功罪不  
掩此督撫監視諸臣所以援例會題而戶部臣

畢自嚴等所以如議覆

請也今奉著同刑部確擬來看之

旨臣等覆閱招繇質諸律例則所擬葉有光夏鼎妻  
榮之永成王琰金調鴉金世任胡時和沈家駒  
之贖配楊一楨之杖懲亦既無枉無縱情法允  
協矣同知張織職司錢穀覺察不早何所辭罪  
但既無染于先復追完于後而平時開濬之功  
又爲今日補過之地推情論罪坐以失于覺察  
之條亦足蔽辜矣既經兩部會議僉同相應會

奏覆

請恭候

命下臣部移文各該衙門遵奉施行

崇禎五年八月十九日具題本月二十五日奉  
聖旨完贖減處不足示儆前已有旨何得輕縱長貪  
葉有光等俱著確擬另本來行欽此



題定各鎮援萊兵餉造冊入東省疏

題爲亟請月餉以濟兵食事專理新餉山東清吏  
司案呈奉本部送准順天巡撫傅宗龍咨前事  
內開准山東援勦總兵官鄧玘手本請將七八  
兩月餉銀早爲查發委官押解前來等因到院  
准此爲照川兵調援東勦先准部議月餉仍支  
薊庫鹽菜行糧支之山東及本院委官將前發  
五千兵五月分月餉銀一萬零五百兩解至山  
東而鄧鎮回稱各兵月餉行糧俱于東省支訖

所有解到銀一萬五百兩恐解回不便寄貯青  
州府庫訖今該鎮又來索餉不惟往返稽遲且  
沿途押解疎虞誰執其咎合無將續發川兵二  
千名並先發五千名月餉並塩菜行糧俱于山  
東支領庶各兵無庚癸之呼而進剿收飽騰之  
效等因移咨到部又先准昌鎮督治侯恂咨稱  
行據昌平餉司呈蒙本部劄付查得本鎮新營  
官兵奉

旨東援該陳總鎮統領于五月初一日起行應有錢

糧除七月以前俱從本鎮轉解外或念東省地方擾亂路途多警以後月餉仍遵兵部題議月餉俟兵到之日就彼支給之

旨徑發山東餉司給領唯將養贍家口銀兩扣撥本鎮支給等因呈詳到院據此案查昌鎮新兵東征先准兵部咨爲亟報退兵情形事內有月餉俟兵到之日就彼支給之

旨今內部給發昌鎮轉解山東不惟輸運艱難抑恐耽遲時日請遵

前旨徑發山東餉司領散惟有家口兵丁六百餘名  
合無自七月爲始每月准給五錢卽于昌鎮是  
貯新餉內動支報銷仍移會新餉司照數扣留  
則行者旣免呼庚而居者亦無啼饑矣等因到  
部送司爲照昌鎮關稅務兼兵丁事同一體所  
需月餉相應併議題

請案呈到部該臣等看得登萊伯獮屢分關薊昌各  
之精銳以應援有原係行月兼支而今仍舊有  
有月餉外復加行鹽者總資宿飽以示鼓勵續

該兵部題有月餉在彼支給之

旨而臣部題仍于各鎮給發初意孔李諸賊釜底遊魂旦夕撲滅各鎮經制初定按月題發援萊兵丁皆從中挑選者兩地分發恐有濶冒故額外之行塩俱行東省支給額內之月餉俱發各鎮解給臣部仍依各鎮經制銷筭雖畧清楚已多一轉運之煩矣今屈指八月於茲萊圍未解叛賊未得援兵之撤尚無期也而各鎮月餉轉解艱難非耽時日則防疎虞昌薊督撫諄諄慮之

再三略議誠不如援餉徑支東省之爲便擬  
計各鎮援萊者除馬匹料草俱隨營支本色原  
無行草行料并行糧塩菜俱在東省支給外其  
在本鎮給發者共計關寧東漢兵丁四千九百  
一十八員名月需餉約銀一萬兩密雲援萊兵  
丁三千六百餘員名月需餉約銀六千兩薊州  
援萊兵丁七千餘名月需餉約銀一萬三千兩  
昌鎮援萊新兵丁二千餘名月需餉約銀三千  
二百兩內有家口者六百名每名五錢千內扣

留養濟銀三百兩舊兵二千餘名月需餉約銀  
一千五百餘兩通共月需餉銀三萬三千七百  
餘兩前議東省留餉七十二萬竊計風霍之際  
殘破之地徵輸未必圖滿然據薊撫咨稱月餉  
解發東省鄧玘回云各兵月糧俱于東省支給  
前銀暫貯青州府庫則東省目前未必便虞匱  
乏也今宜一面行令各鎮督撫將援兵原食月  
餉及發兵行塩則例備細造冊咨送臣部轉發  
山東撫按照例支給但恐援兵待哺時刻難待

一面行令山東撫按責令糧萊將領各將援兵月餉行鹽從實先造花名細冊呈送東省院道一併給發但不得踰例多開仍俟各鎮督撫造冊至日磨對則例有浮冒者卽行追扣其新經逃亾事故者亦須查明扣除以免混淆又昌兵家口養濟銀三百兩東省于本兵月餉內扣除臣部仍將各援兵月餉于每月預奏時照數扣存在庫或異日東餉不敷則移此以與之敷則另貯備用俟東事平定援兵回鎮仍歸經制之



內至于山東撫臣收過留餉若干并各營支數  
大數亦宜不時咨報臣部以便酌量接濟勿以  
倥偬而廢綜核可也既經昌鎮督撫移咨前來  
相應題

請恭候

命下臣部移文各該衙門遵奉施行

崇禎五年八月廿四日具

題本月二十六日奉

聖旨東省援兵月餉卽著于該省支給其各鎮應發

銀兩部扣存庫酌補俱依議仍著各該督撫按嚴  
飭造冊明白送核以憑銷算如有濶冒等情罪坐  
所繇欽此

覆楚按題豁黃州府歐推官叅罰疏

題爲懇查解過餉銀以明官守以辯叅累事專理  
新餉山東清吏司案呈崇禎五年六月十三日  
奉本部送戶科抄出湖廣巡按御史白士麟題  
前事內開據湖廣布政使司經歷司呈奉使司  
劄付據黃州府推官歐起鳴呈稱職自崇禎四  
年三月委署府事以及年終仰凜

功令共解過正續襍餉三項銀八萬九千三百一  
十六兩一錢八分零又於本年十一月內奉文

預徵五年新餉三分職卽一月內嚴行督催  
完過二萬九百有零一片苦心可謂竭蹶無遺  
矣不意四月初七日忽聞邸報有餉院叅疏內  
云黃州府加派餉銀未完三萬六千四百七十  
三兩計欠三分六釐知府以被論回籍在二月  
內遺欠遡餉三萬六千推官歐起鳴按署期年  
不徵毫末慢令有心急公無術曠官之罪吳辭  
職閱之不勝駭異且黃州一府餉銀共一十萬  
一千一百有零今職已完過八萬九千三百二

十六兩一錢又預徵五年新餉完解二萬有零  
合正雜新餉而覈實職自署事以來已解過十  
一萬有餘矣如果不解毫末必係蒙面喪心負  
朝廷而慢

功令叅糾何辭但職嘔心瀝血奉公完解將謂十  
萬以外金錢可以少充

國用亦可稍蒙鑑賞乃至反受題叅深爲冤沒懇  
乞俯賜分豁查驗將職所解錢糧分數造冊轉  
詳兩院辯明入疏等因到司據此議詳間隨蒙

巡按白御史批據本官詳同前事蒙批布政司  
喚歐推官眼同經承吏書從頭清筭盡數確報  
以憑具題速速蒙此先奉巡撫魏右副都御史  
批據本官詳同前事奉批仰布政司確查速報  
奉此查得黃州府屬崇禎四年新舊加派額銀  
九萬一千八百二十兩一錢零六釐襍項屯餉  
共銀一萬零二百五十九兩八錢六分三釐通  
共額銀十萬二千零七十九兩九錢六分九釐  
前任知府閻顧行於二月內被論回籍止督完

預徵餉銀一萬一千四百二十二兩一錢六分  
解部交納尚遺未完銀九萬零六百五十七兩  
八錢零九釐推官歐起鳴自三月接署以及年  
終催完正隲遼餉及買運海米共銀七萬三千  
二百零八兩七錢六分俱有解獲批收月日領  
解差役姓名在卷况五年預徵新餉本官捧檄  
之後加意督催徵完二萬零七百七十八兩已  
委官麻城縣縣丞毛鑛領解赴部又督完各年  
舊欠及生員優免等銀共一萬三千一百一十

兩零五錢連前完解四年分通共十萬七千零  
九十七兩歷歷可據本官急公一念可謂殫竭  
無遺矣伏乞特賜具題達部稍寬斧鉞俯從開  
復以覘後効等因具詳到臣據此該臣會同巡  
撫湖廣右副都御史今華職聽勘臣魏光緒看  
得黃州府推官歐起鳴素有才幹非尋常循良  
者比其委署府篆乃去年三月事也至年終僅  
十閱月催科竭盡心力起解罔敢愆期本官接  
署以後業能解過正禱邊餉七萬三千餘兩續



又徵解過五年預徵新餉并優免屯餉等銀前  
後總算本官共完解過一十萬七千餘兩批收  
月日歷歷可據以實心任事而論本官可謂無  
媿矣忽見餉臣查叅疏中有毫末不徵等語諒  
必有所憑以入

告而反覆思維殊爲本官扼腕也業據該司查覆本  
官任內陸續催解正禱等銀報冊雖有先後叅  
處委屬可原等因本年六月十一日奉

聖旨該部查明具奏欽此欽遵抄出到部送司查得

黃州府署印推官歐起鳴先該督餉御史吳煥  
歲終本官未完四年分違餉三萬六千有奇計  
欠三分以上積該覈餉部科會叅該府除積欠  
外止欠二分以上將推官歐起鳴照署印例議  
在罰俸之列及本部彙覆查委未完二分議將  
本官照署印例罰俸兩月于本年五月內覆奏  
欽依遵行在案又餉院差滿舉劾一疏復將本官列  
在所劾之內本部查得本官逋欠無幾已經歲  
叅罰俸姑從免議亦于五月內具覆奏

旨下吏部遵行在案今該按臣具題前因相應查議  
具覆案呈到部該臣等看得軍興餉急

朝廷以

功令鼓舞羣吏莫不爭效拮据以自表見如黃州  
府正祿餉共十萬二千有餘知府閻顧行被論  
回籍推官歐起鳴署篆經徵據司府報完不一  
臣部止以到部爲準已解到七萬二千有餘又  
預徵三分已解到二萬有餘在餉院題叅之時  
猶未完在三分以上餉院以爲未完者盡前官

之遺欠不知已完者盡署官之催徵也迨臣部  
覆疏之時未完止二分以上分欠於前官而補  
美於預徵計作全完亦不爲恕而臣部責成見  
在條晰年分仍以未完二分溥從奪俸亦不爲  
苛本官之所以喋喋剖陳該按臣之所以代爲  
扼腕者則以有署印期年不徵毫末之語舉催  
科之苦心盡爲埋沒本官亦矢志急公者不肯  
以曠官自居也今已完之餉俱經昭揭已罰之  
俸又已歷過從前官評固自無損卽本官亦何

煩深辯爲也既經按臣具題前來相應覆  
請恭候

命下臣部移文該省撫按并咨吏部查照施行  
崇禎五年八月二十五日具

題本月二十八日奉

聖旨知道了欽此

覆查關門應存行守二糧疏

題爲清查應存糧米以濟實用事專理新餉山東  
清吏司案呈崇禎四年閏十一月初四日該本  
部題覆前事內開天啓七年原題關寧行守二  
糧十萬石崇禎二三年餘米行糧六萬餘石屢  
經查催未報銷算是不可不一窮究根因者或  
題而未發或發而未足或已發足而行守涸支  
苦無清數皆不可知然自天啓七年起至崇禎  
三年止漕糧遼米原有定數撥運收支原有定

額合而算之虛實多寡自難隱瞞事關軍儲相應請

勅津部督撫諸臣堯底打算要見行守二糧曾否分撥有無侵隱等因崇禎四年閏十一月初十日奉

聖旨閔寧本色輸運甚艱乃應存數至十六萬石竟無歸着該部何時不奏明僅以文移聽其支抵卽着嚴行津部及閔寧督撫司道通將天啓七年起至崇禎三年止發運若干實收若干支放若干

順月挨查合盤銷算務得確實根繇明白具奏如  
敢隱徇朦欺經承各官重治不宥還立限與他前  
翟世顯以假弁侵糧一萬八千石奉旨已久曾否  
追完如何玩延不結併着翟鳳翀自行回奏欽此  
欽遵通行遵照去後除翟世顯侵糧一案隨該  
津部覆鳳翀于閏十一月內具疏回

奏奉有

新旨下部勒催浙江撫按于茅元儀名下追補近該  
本部于月奏疏中摘叅亟催外所有清查糧米



一事節經催據關寧餉司并天津餉道陳繼堯  
冊報部送司相應覈覆案呈到部該臣等看得  
海運風波之險最爲不測而船戶完欠之數亦  
多影射臣等究心綜核因見天啓七年于預計  
外題有行守糧十萬石原議運貯關寧以備緩  
急又崇禎二年分關寧額米因臣部預計在先  
袁崇煥新定經制在後該剩米四萬四千七百  
五十四石六斗又三年分關外原派未經開銷  
行糧米二萬石共應存米十六萬四千七百餘

石臣等雖于預計疏中每每拈出扣抵然恐歲  
易事遷或以混淆滋冒濫也行查不已繼之題  
催以要其歸轉慮官更更改或以彌縫飭侵漁  
也堯底清查責之合算以窮其源乃奉

旨嚴查檄催再四而關內司道咸以行守二糧在內  
部雖有題

請在津門實總爲發而關內亦總爲收通融支放並  
未立有行守名色爲詞關外司道亦以津派米  
豆原無行守字樣故該廳槩爲收却難以辨別

所可稽者止有以寧鎮之收數合津門之發數  
滿盤打算有無自見爲詞天津餉道張志芳呈  
稱天啓七年應運關寧米并行守糧十萬石共  
計米八十三萬八千二百四十六石本年運發  
除足額外尚多運米三萬五千七百三十三石  
二斗行守二糧已經盡數發運關寧等因各將  
運收過米豆數目自天啓七年起至崇禎三年  
止造冊前來以聽磨勘臣等謹按二處文冊參  
稽互核在津門有正運有帶交有實收有掛欠

有失風撈救并追補扣抵以及漂失劫燬等項  
之不一在關寧有正收有兌收有越却有改撥  
有收上年之帶交者有收上年之守速者有關  
外改收于關內而實收仍出之關外者分年另  
算多互異而不同合盤通算覺大同而小異總  
計七元二三年天津冊開發過關寧額派并行  
守糧共米三百三十九萬一千八百三十五石  
九斗三升九合二勺一抄一撮內已獲實收米  
三百一十八萬八百一十六石一升一勺一抄

一撮掛欠并失風掛欠及三年分未獲實收起  
却掛欠共米六萬五千四百四石四斗七升五  
合一勺內除帶交過米共二千二百七十七石  
五斗八升七合追補上倉米三千四百七十五  
石七升七合贊司扣過銀二萬九千七百九十  
八兩七錢四分五厘八毫每銀一兩算米一石  
抵米二萬九千七百九十八石七斗四升五合  
八勺又除黃尚禮何先等人船無踪米一千八  
百七石九斗二升三合莫可追賠應銷外尚應

查追米二萬八千四十五石一十四升二合三勺又撈救米共二千七百九十四石三斗四升內除補交過米二百二十八石五斗尚應存米二千五百六十五石八斗四升此外失風米共一十三萬三千八百六十六石一斗二升四合

又

皇木撞沉米五十二石九斗九升賊劫虜燬水衝共米八千九百二石三項共失米一十四萬二千八百二十一石一斗一升四合應分別查扣

脚價發過關寧豆麥共一百八十一萬四千一百四十四石一斗九升八合八勺內已獲實敢  
豆一百六十六萬三千八百七十三石七斗五升五合一勺掛欠并失風掛欠及三年分未獲  
實收起卽掛欠共豆三萬六千九百九十石五斗九升二合七勺內除帶交過豆六百二十四  
石八斗四升三合追補上倉豆六千九百五十八石八斗八升三合一勺贊司扣過銀一萬四千六百四十六兩九錢六分九厘三毫冊開每

銀五錢折豆一石但查節年召買原價每石五錢五分應照原價折筭計抵豆二萬六千六百三十石八斗五升三合二勺零又除人船無踪焦可達何先等豆一千八百六十八石八斗八升莫可追賠應銷外尚應查追豆九百零七石一斗三升三合四勺又撈救應存豆三千九十二石四斗五升此外失風豆共八萬九千一百零八石一斗八升六合又

皇木撞沉豆六十八石三斗九升賊劫虜燬水衝



火燒共豆二萬一千一十石八斗二升五合三  
項共失豆一十一萬一百八十七石四斗一合  
亦應分別查扣腳價此津發開寧米豆總撒完  
欠之數也及查關內外冊開收過津運七元二  
三年米共三百一十八萬三千三十石七斗二  
升二合二勺一抄一撮對津冊已獲實收米三  
百一十八萬八百一十六石一升一勺一抄一  
撮天津少獲實收米二千二百一十四石七斗  
一升二合一勺關內外冊開收過津運豆麥一

百六十八萬六千一百七十石五斗七升三合  
三勺對津冊已獲實收豆一百六十六萬三千  
八百七十三石七斗五升五合一勺天津少獲  
實收豆二萬二千二百九十六石八斗一升八  
合二勺此關寧收過津門運發米豆參差之數  
也就中多寡互異之故應令關寧餉司天津餉  
道查明報部覈覆至于贗司扣過米豆銀共四  
萬四千四百五十五兩七錢一分五厘一毫既  
未買補米豆應查贗庫除廩費工食支銷外見

存若干報部以供正額其追補上倉米共三千  
四百七十五石七升七合上倉豆共六千九百  
五十八石八斗八升三合一勺并撈救未交米  
二千五百六十五石八斗四升未交豆三千九  
十二石四斗五升旣未運發補交應查見今有  
無實在至于失風并賊劫虜燬水衝人船無踪  
等項共米豆二十五萬六千六百八十餘石一  
顆一粒悉皆軍命民膏顧乃棄擲若許卽間有  
船戶逃亡豈無總運委弁并保結者之當根究

者乎矧舊例每石扣船戶水腳并扣水艚工價  
各六分縱不能一一責償原額而前項應扣銀  
兩曾否扣存作何着落并當責令遼餉道臣逐  
一查明冊報勿使併此扣存而復飽奸胥之腹  
可也夫有收則有放然前項收數單指四年內  
準運而言此外尚有附關召買并舊管還官積  
羨等項俱應彙入收數以合開除實在乃始清  
楚統計七元二三年內關內共收過米一百三  
十一萬六千一百五十九石七斗七升九合二

勺七抄五撮共放過米一百二十一萬四千八百七石一升二合三勺三抄五撮應存米十萬一千三百五十二石七斗六升六合九勺四抄內各倉委金銘等拖欠米六千四百八十七石一斗六升五合二勺共收過豆四十六萬二千一百四十五石一斗二升一合三勺二抄共放過豆三十萬五千九百二十石二斗三升四合一勺二抄應存豆一十五萬六千二百二十四石八斗八升七合二勺內各倉委金銘等拖欠

豆一千七百五十五石七斗八升以上拖欠米  
豆亟宜勒限監追完納者也關外共收過米并  
小麥作米共二百二萬四千五百三十五石八  
斗三升七合一抄一撮共放過米一百八十五  
萬四千三百六十石二升三合七勺一抄八撮  
實在米一十七萬一百七十五石八斗一升三  
合二勺九抄三撮共收過豆蕎麥一百二十四  
萬三千八十九石三斗九合四勺共放過豆九  
十六萬一千四百七十石五斗五升二合一勺

八抄六撮實有豆麥二十八萬一千六百一十八石七斗五升七合二勺一抄四撮此關寧收放實在米豆之數也以關寧之收卸對津門之運發復以關寧之除在合關寧之管收蒲盤打笑無容欺隱乃知行守二糧總在運發完欠之內而應存糧石總在實收失損之中祇緣津門不分行守字樣以致關寧未立行守名色耳然既查無別弊可無他求惟是掛欠失風之已追未補及應扣應存等項不得不徹底清查少資

補濟于萬一也謹將天啓七年起至崇禎二年  
止津門運發完欠并關寧收放實在米豆各數  
目逐一查對明白具疏覆

請恭候

命下臣部移咨津撫并行遼餉道查照疏開數目將  
應追者勒限嚴追應扣者設法查扣務期清楚  
仍先將已追未交米豆已扣應存銀兩是否如  
數實在曾否作何支銷火速查明據實

奏報作正支銷并行遼餉道及關寧餉司將彼此



實收米豆多寡參差緣故確查明白逐款登答  
前來以便覆覈施行

崇禎五年八月二十六日具題九月初一日奉  
聖旨據奏行守二糧應存糧石查無別弊知道了其  
掛欠失風已追未補及應扣應追等項著該撫道  
查照疏開疏數目嚴追查扣仍先將米豆銀兩實  
在支銷依議據實速奏併著該司道確查實收參  
差緣故逐款明白報部不得濶率欽此

覆山西留餉疏

題爲寇禍愈大勦禦乞專懇祈

皇上軫念危疆速

勅會議秦晉豫三省扼要之地暫設專督如川黔例  
再調秦中戰捷兵將大舉合勦早平禍亂事新  
舊兩餉司案呈崇禎五年八月二十四日奉本  
部送戶科抄出山東道監察御史劉令譽題前  
事議請設督調兵留餉等緣繇本年八月二十  
三日奉

聖旨據奏晉賊屢報斬級皆屬欺飾隱匿如何監視  
及巡按御史不行查叅本內請留錢糧著酌議奏  
奪寇賊流突各省撫鎮俱著儻力奮勦協圖殲禦  
自可立盡專設總制不必行餘俱有旨了該部知  
道欽此欽遵兵科外抄到部本月二十五日又准  
兵部咨爲流寇奔擾不已地方滋蔓堪憂謹擬  
近日情形恭報

上聞事覆山西巡按李嵩題前事內覆稱犒士賑饑  
之費必不可少臣部請于積存班軍老幼銀及

捐助贓罰襍項議奏一萬兩戶部亦宜設處三萬共四萬兩特遣官一員齎往以示

朝廷軫念西人至意兵民聞之當必有感激思奮悔罪投誠者等因本年八月二十三日奉

聖旨晉賊蔓延已有旨著張宗衡督勦卽著會同陝西督撫責成兩省道將沿河控制協力擊殲仍分投追撲銳圖掃蕩所請犒士賑饑銀兩依議同戶部速發差官齎往以昭朝廷軫恤輯寧至意其河北井大各道俱著移駐要地嚴兵塞險防遏堵禦

毋得疎忽致有寃犯爾部速行馳諭欽此欽遵全  
容戶部煩照題奉

明旨內事理希速發銀三萬兩會同本部作速遣官  
齎赴晉省以備犒賑等因到部奉批山西司查  
議速行又准宣大總督張宗衡咨爲急請大兵  
厚餉以圖克復以靖禍亂事內開本年八月十  
八日據分巡河東道左布政使呂遜呈前事等  
因據此爲照流寇蔓延迄無底定茲且襲城破  
邑聲勢益兇似非晉兵所能蕩平者陽和掖兵

精銳者職節次俱已發盡目前職急親征苦無  
兵馬可帶宣大雖在督屬各有封疆之責挑而  
復挑勢難空國業已疏

請兩鎮各再發馬兵五百給職親統情形具在疏中  
今據道詳請發邊兵數萬以圖大創請發新舊  
遼餉以資征勦請遣大將曹文詔謂賊畏民懷  
撲滅有期數事俱屬喫緊均應俯從但事關重  
大未易徑題謹會同山西撫按宋紘殷李嵩擬  
合咨請爲此合咨貴部速爲主裁題覆施行等

因到部俱送到司相應併議題

請案呈到部該臣等看得東西交訖所在軍興以致  
薊遼待炊之急需左留右割臣部量入爲出之  
定額日損月虧臣等言念及此怒馬如搗誠不  
知其所終也三晉自泥寇發難以來軍餉費臣  
部區處者不知凡幾本年五月臣部覆臺臣李  
嵩之

請復將該省五年分餉捐銀六萬八千一百六十餘  
兩議聽留用若謂勦殲有資蕩平足恃矣不意

賊蔓彌熾費餉不貲臺臣劉令譽并督撫張宗衡等復有留餉之

請也疏云陝西山東俱有成例不知東省之餉原係留供登島之物不過移以餉之非有損于部額也晉省諸兵自有年例卽征調別兵亦各有本等月餉而軍前所需者不過行糧犒賞而已前留六萬八千之襍項爲數已多今旣告匱自宜再議但查該省新餉從前並無未完止五年分尚有未解加派銀四萬四千五百五十六兩三



錢零生員優免銀九千八百三十四兩三錢零  
巡按公費銀二千兩河東運司助餉鹽課銀八  
千四百兩共六萬四千七百九十兩零盡數留  
充該省征勦行糧犒賑之需此數項者皆係歲  
解見銀隨取隨足更無俟臣部解發之煩也夫  
既有前留六萬八千一百六十餘兩復有今留  
六萬四千七百九十兩臣部之爲三晉計者可  
謂悉索以應矣至于兵部題派三萬兩臣部欲  
筭于留餉之內恐負

聖明沛發之

天恩無已於舊餉內奏處三萬兩卽抵三關餉司秋季年例同兵部發銀一萬兩遵

旨差官徑解軍前支用蓋晉兵屢潰其逃亡曠役者不少故近有寧餉截加宣丁之議則哀此益彼正以遵

明旨而濟急需耳仍取該餉司實收繳部以便銷案則留者如許發者如許或犒或賑應手不乏想在事督撫道將諸臣當必有一翻舊勵亟謀協

剿銳意掃蕩以仰副

皇上軫恤輯寧至意無復逡巡糜餉徒勤呼籲可也  
若夫搜括勸助以佐軍興則在督撫按道權互  
力行共奏膚功耳萬一再或不敷姑俟冬春之  
間不妨據實

奏報容臣于六年新餉內酌議量留以資接濟既  
經臺臣具題并兵部督臣移咨前來相應覆

請恭候

命下臣部移文各該衙門遵奉施行

崇禎五年八月二十九日具

題九月初一日奉

聖旨這晉省未解五年分加派等銀盡數留用併奏  
發舊餉三萬兩俱依議還著該督撫按設法按勸  
以佐軍興不得專恃內請仍一面飭勵道將鼓銳  
協剿速圖戡定毋致玩延又復請留取罪欽此